

Nkalanj ní bwâm míme Yesuε ngáne

Makωσε átélé

Ndibned ní kálag

Nkalanj ní bwâm ngáne Makωσε átélé níhóbe t̄ngene Yesu Kr̄st̄əə, Mwǎn a Dyōb. Nlúmté Yesuε ngáne mod awě abele mekan, awón-’ε kunze ábel míme mekan. Ene kunze enyínnédé áyāl e mekan míme áyágté’áá ne míme ábélé’áá. Yesuε ahóbé áá móṣ módē Mwǎn-a-Moonyon awě ampě, ábe ádē alongé, ábel boj bad békud alagsen dé mbéb.

A kálag tē wén, Makωσε ábídté mekan áwed míme Yesuε ábélé’áá tómaa míme áhóbé’áá ne míme áyágté’áá. Ahóbe ngáne J̄one áhángé epe éche Yesuε, ahób t̄ngene edusen éche Yesuε, ahób-pe mekəgsen míme Yesuε ankudté. Asóged, alúmté áte ngáne bēmboméé Yesuε á awog ne ngáne ampúú’é. Nyaa édé ébe éche enén kálag ésógé, élúmté-’ε nén bán saké Makωσε atelé chó.

Nkabtéd ní kálag

Mbooted mé nkalanj ní bwâm *1.1-13*

Nsón míme Yesuε á Galilia *1.14-9.50*

Nsón míme Yesuε áde áhídté a Galilia ápe á Jerusalem *10.1-52*

E’pun bé asóg ábe Yesuε á Jerusalem ne benben ne Jerusalem *11-13*

Akáad áde békáádté Yesuε ne kwééd eche áwédé *14-15*

Mpuu míme Yesuε *16.1-8*

Alúmed áde Sǎngwéé alúmté yǎl ámbíd e mpuu ne mpume míme *16.9-20*

*Ehângé éche Jone, Ndusene
(Mat 3.1-12; Luk 3.1-18; Jon 1.19-28)*

¹ Nkalaní ní bwám níme Yesu Krístə Mwǎn a Dyöb mǎmén.

² Mbóótédé ngáne nkal é'dəádəŋ Yesayaa ántenlé aá,
“Dyöb áhóbé aá,
'Nóné', nlóme nímém mésénzε níme mésébē wε
á'sō,
áboŋsεn wε nzii.’

³ Móbélé' ehângé á ehyánge nén,
'Nyéboŋsεn epε éche Sánŋwéé. Nyétii echě nzii.’ ”

⁴ Né-ó Jone ampě á ehyánge, ádusén bad, ákalé-
'ε eyale é Dyöb aá, “Nyétede abel dé mbéb, nyékud
edusen ábel boŋ Dyöb álagsen nyé mbéb.”

⁵ Bad bébídé'áá á mbwóg e Judeya esyəál ne á
dyad á Jerusalem, békag áwē áwóglen mó. Néε
bēmpaléé nímāb mbéb áte Jone ádusén bó á edib é
Jodan.

⁶ Jone ahágé'áá mbóté éche bébénlé nyon éche
ébídé á yǎl e kamêl.* Awáá'áá ngóá a ngob e nyam.
E'chuu ne bengóméé bóó ádyágé'áá.

⁷ Ahánťé'áá aá, “Mod äpě ámbid echēm awě
atómé mε. Meékwognedεé ké ábwaam ásē áhune
nīmē nkəəd mé metámbé.

⁸ Ndusan nyé ne mendíb, boŋ ádusén nyé ne
Edəádəŋ éche Ésáá.”

*Yesuε akudé edusen ne mekəgsen
(Mat 3.13-4.11; Luk 3.21-22, 4.1-13)*

* **1:6** Bébénládtáá nyon é nyam eche béchəgεé bán Kamêl ábel
mbóté. Mbóté éched éébáge'aá kunze é mbóté.

⁹ Mmê mesú Yesuε ambíd á dyad á Nazaret á mbwóg e Galilia ápe wée Jone. Jone andusén mó a edíb é Jodan.

¹⁰ Ade Yesuε ábídeé á edíb-te dǎǎ anyíné née ngob e dyöb énednadté. Edǎǎdǎǎ é Dyöb émbíd ádyöb, ésud mó á nló mín née élǎǎ.

¹¹ Héε ehób ébídeé ádyöb nén, “Edíi awem mwǎn a nlém awé ndǎǎ bwǎmbwam. Ndé menyinje ne wε.”

¹² Abwǎg-ábwǎg échê Edǎǎdǎǎ ênkid Yesuε á ehyánje.

¹³ Andyéé áwed móom mé e’pun méniiin, Satane ákágé mó. Nyam échê ékaa’ ébédeé áwed, ángel-le éwǎngǎn mó.

Yesuε apwedeé bembapeé bé’sǎ
(Mat 4.12-22; Luk 4.14-15, 5.1-11)

¹⁴ Ambíd e pǎndé bénhē Jone á mbwóg. Ade bémáá mó ahé á mbwóg, Yesuε ampě á mbwóg e Galilia ákalé nkalanj ní bwám ní Dyöb, áhǎbē nén,

¹⁵ “Pǎndé epedé, nkamlen ní Dyöb níde benben. Nyé mod téé áhǎnjen áde abé dé mbéb, nyédúbe-’ε nkalanj ní bwám.”

¹⁶ Ade Yesuε ábamméé nkin mé edib-é-nzab é Galilia annyín Simone bó mwǎnyan Andreyá, née bébwéméé mbínzé. Bébédeé bekób-bé-súu.

¹⁷ Héε Yesuε álǎngéé bó aá, “Nyéhíde me. Ngáne nyékóbeé súu bǎǎb, meéyǎgēd nyé ngáne nyétēdtē bad nlém á abum áhíd me.”

¹⁸ Abwǎg-ábwǎg bēntēdeé échab mbínzé, béhidē-’ε mó.

¹⁹ Née ákíi mwǎ etún, annyín bǎn ábe Zebediε, Jemse bó mwǎnyan Jone á bǎle-tē née bébwéméé mbínzé.

²⁰ Anyín ádë ányíne bó, anchélé bó. Bêntedé echab sán Zebedie ne bad bé nsón á bǎle-tê béhíde Yesue.

*Yesue abídté mod edǎǎdǎǎ é mbéb áte
(Luk 4.31-37)*

²¹ Yesue ne ábê bembapεε béniin bēnkě á dyad á Kapenahum. Adě mbwε-mé-nkóme-áte nípedé, Yesue ankě asól á ndáb e mekáne, ábootéd bad ayáged.

²² Nyaa eche áyágté'áá enkóméd bad yǎl áte bwâmbwam áyāle ayágté'áá née mod awě nzé ahóbé né é máá. Eeyágte'áá nēngáne bemeléede bé mbéndé.

²³ Héε mod nhóg awě edǎǎdǎǎ é mbéb émbēε áte ápedé taléd, ábōnē áá,

²⁴ “A-Yesu, mod a Nazaret, cheé syánē déwónné? Ehyedé sé awúu-ye? Mbíí wε bwâm. Edíí mod awě Dyǎb álómé, awě asáá.”

²⁵ Héε Yesue ákânneé échê edǎǎdǎǎ é mbéb áte áá, “Lám, bíd ane mod áte!”

²⁶ Dóǎ échê edǎǎdǎǎ é mbéb éságté ane mod áte ngíne-ngíne, éhé-'ε esaád é ngíne, bonj ébíd-te mó áte.

²⁷ Menyáké ménkōb ábê bad bwâmbwam. Bésedté nhóg ne aníníí bánken, “Nzé-dyámé dén! Ayáged dékǎǎlē dén-ε? Anén mod awóó ngíne ákamlεn e'dǎǎdǎǎ bé mbéb, é'wōgnē-'ε mó!”

²⁸ Nén dēmbǎl nkalanj níme Yesue mēnkanléd mbwóg e Galilia esyǎál.

*Yesue achǎǎjté ekud é bad
(Mat 8.14-17; Luk 4.38-41)*

29 Née béhídté á ndáb e mekáne hidtén, Yesue nchoo ne Jemse bó Jɔn bēnkě á ndáb eche Simone bó Andreyá.

30 Simone mwaád nyaá ambé á anɔŋ dé nkole, ahéb dēnsog mó. Ade Yesue ápédé pēén, bēnlāā mó tɔŋgene nkole míme ane mmwaád.

31 Dóo ákíí wée ane mmwaád ábédé, bon áchɔŋgē mó á ekáá, awóŋgén mó ásyə ásé. Ahéb dēmmaá mó, ákōb-pe bó nken.

32 Ene ngukél áde enyɛn é máá asud, bad bēmpēén bad bé nkole bésyāəl ne bad bésyāəl ábe e'dáádəŋ bé mbéb bēmbēé áte wée Yesue.

33 Bad bé dyad bésyāəl bēnkaŋnén mmwe ndáb míme Simone.

34 Yesue anchoód bad híin ábe békónlé'áá nkole nyaa ne nyaa, abídéd-te bad e'dáádəŋ bé mbéb híin áte. Eémwage'aá pɛn áá ábê e'dáádəŋ bé mbéb é'hôb dyamdyam áyāle bémbíi mod awě ádíí.

*Yesue akalé nkalaŋ ní bwâm á Galilia
(Luk 4.42-44)*

35 Epɔg é mbwembwe áde bɪn béékɛnlē, Yesue anhidé ásé, áhídē á dyad-tê, áke á ahəŋgé á hōm, ákāne'.

36 Simone ne bad ábe bóbo bēmbē, bēmbootéd Yesue ahéd.

37 Bédíbté-'áá mó, dóo bəlɔŋgēé mó bán, “Moosyáəl ahede we!”

38 Yesue anláá bó áá, “Dékag hōm démpēe. Dékag á myad míme níde benben ábel bon níkal nkalaŋ ní bwâm áwed ámpē, áyāle nímé nkalaŋ móo níkáó bon nípē á nkōŋsé.”

39 Né-ǝó, ankě mbwóg e Galilia esyǝál, ákalé nkalanj ní bwâm á ndáb é mekáne, ábídtē-’ε bad e’dǝádǝanj bé mbéb áte.

*Yesue achǝjté mod awě meləj mékóbé
(Mat 8.1-4; Luk 5.12-16)*

40 Mod nhóg awě meləj mékóbé ampě wée Yesue, abwóg mebóbón, áchāā mó aá áwōηgen mó. Anhób aá, “Nzé edǝó ehεle ébēl me nsáj.”

41 Ngǝl enkonned Yesue. Dǝó ábídté ekáá, ábānē mó á yǝl, boj álāngē mó aá, “Ndǝó, sáj!”

42 Abwōg-ábwōg níme meləj mēmmaá ane mod á yǝl, áchōη-’ε.

43 Yesue anláá mó aá ákag, asím-me mó etúu áte aá,

44 “Nǝné’, weelāngé modmod dyam áde ábénlédé, boj kě élúmed yǝl wée prise, ásimen wε. Ebag-ke mende ngáne mbéndé e Moseε ehεdée, álúmed bad wée mósaā.”

45 Boj ké nê, áde ane mod abíde, ankě, áke ákalé mó níme nkalanj hǝm ásyǝál. Ankal mó bwāmbwam nyaa eche Yesue éehεle’aá dyad ké ahóg asól ámpē á ntálé. Antím ádyεé’ á mehāngé wée bad béesaá. Ké nê, bad bébíde’ mebwóg mésyǝál béhyāg awē.

2

*Yesue achǝjté mod awě awédé epεd
(Mat 9.1-8; Luk 5.17-26)*

1 Néε nguse é e’pun étómé, Yesue ansú ámbíd á Kapenahum. Bad bēnwōg bán ahúú.

² Ekud é bad énkūmēn áwe ndáb nyaa echě etál éébēdēé á ndáb-te, ké á mmwε. Yesuε akānlé'áá bó eyale é Dyōb.

³ Hée dōo bad bēniin bépééné mod awě awédé epeɗ.

⁴ Boŋ ngáne ndun e mod émbēē áhed, bēnkēnhēnlé mó apεεn wée Yesuε ábédé. Né-óó, bēnchāgē á ndáb mín, bēnēdē nnŋj ní ndáb á nló mín wée Yesuε ántyēēmmē. Ade bémáá nnŋj anede, bēnsudtén ane mod ebúm éche ánná'é ámín wée Yesuε ámbēē.

⁵ Ade Yesuε ányíné adúbe ádē ábe bad bėwóó áte anláá ane mod awě awédé epeɗ aá, “A-mwān, nłāgséné wε mbéb.” ⁶ Doŋge dé bemeléede bé mbéndé ábe bēndyēé ásē áhed bēmbootéd anyoo áte á nłém-tē bán,

⁷ “Chán anén mod áhēléé se áhōbē' enén ndín e akan? Asyōá Dyōb. Nzéé ahēlese álagsén mbéb ésebán Dyōb dēmpen?”

⁸ Abwōg-ábwōg Yesuε anchēm bó mewēmtεn. Hée ásedtēé bó aáken, “Cheé ékóá boŋ nyéwōō' enén ndín e mewēmtεn?

⁹ Ahée ádé dyam ásad, naa áhób wεé 'Nłagséné wε mbéb,' káa áhób wεé, 'Syōá ásē, étéd échōŋ ebúm ébootéd akε?’

¹⁰ Boŋ, mēlūmēd nyé nēn mēé Mwān-a-Moonyon awóó kunze á nkōŋsé álagsen mbéb.” Dōo álāngēé ane mod awě awédé epeɗ aá,

¹¹ “Nłānge wε nēn, syōá ásē, étéd échōŋ ebúm, ésúé' á ndáb.”

¹² Hē dēn wée moosyōál ánōnéé mó nē, ane mod anhidé ásē, atéd éche ebúm ábootéd-te akε. Yāl enkóm bó áte bwāmbwam, békēnē Dyōb, bēhōbē bán, “Séēnyīnēē sé enén ndín e dyam mbéd!”

Yesue achénlé Levié
(Mat 9.9-13; Luk 5.27-32)

¹³ Ambíd e nê, Yesue antím ámbíd ámpē á nkin mé edib-é-nzab é Galilia. Ndun e mod empě áwē, ábootéd-te bó ayáged.

¹⁴ Ade átómēé á nzii, annyín nlad-é-tááse nhóg awě béchágé'áá bán Levié, mwän awě Alpaseé. Levié andyēé ásē á ndáb echě ákóbé'áá tááse áte. Héé Yesue álângeé mó aá, “Hídé me.” Dóo Levié átyéémé ámín bon áhídē-’ε mó.

¹⁵ Ambíd e pónde Yesue adyágé'áá ndyééd á ndáb wéé Levié. Ekud é besaad bé tááse ne bad bé mbéb bempēe béhídé'áá mó. Bóbō bēndyēé á tébele ne ábē bembapεε.

¹⁶ Ade donge dé bemeléede bé mbéndé ábe bébédé Befarisia bényíné Yesue ádyāg ndyééd ne ábē bad bé mbéb, ne besaad bé tááse, dóo bésēdteé ábē bembapεε bánken, “Cheé ékás bon ádyāg ndyééd ne échē ndín é bad?”

¹⁷ Ade Yesue áwógé nê, anláá bó aá, “Bad ábe bédyēé bwām béētógnεnεé mod-a-bwεl. Bad ábe békónle' bōo hétógnéné mod-a-bwεl. Meépedéé á nkōñsé áchéle bad ábe békóbnédé á'sō é' Dyōb, bon mpedé ayāle bad bé mbéb.”

Nsēdtéd tângene adid á yāl
nzaa á mekáne-tê
(Mat 9.14-17; Luk 5.33-39)

¹⁸ Pónde póg ebédé, bembapεε ábe Jōne, Ndusεnε ne Befarisia bēndíd yāl nzaa á mekáne-tê. Dóo bad behóg bépédé wéé Yesue bon bésēdte mó bánken, “Cheé ékás bon bembapεε ábe Jōne, Ndusεnε ne ábe Befarisia bédidé yāl nzaa á mekáne-tê bon ábōñ pεn béedidé’?”

19 Yesue ankwentén bó ne ngan aá, “Chán bad ábe bélébpé á ngande e e'wóngé, béhele bédidé yǎl nzaa á mekáne-tê áde mod awě akude sómbé ádíi adé ne bó? Béedidéé, béetâηγενεé yǎl nzaa adid á mekáne-tê pónde eché mod awě akude sómbé ádíi ne bó.

20 Bon epun épě éche békobénné bó mod awě akude sómbé. Eché epun dóo bédidté yǎl nzaa á mekáne-tê.

21 Nyébíi nén bán nzé mod anabpe' mbóté, eetédéé eped é abad ékōlē se ábnéd nchun mí mbóté. Ayāle nzé éché eped é abad ébóótédé abób áte ébelé éhábndé abad dé nchun. Nê ábele', éché epōn ékale' áte tómaa ngáne énsēbē abé.

22 Melemlem nêngáne mod éētēdē mím mékōlē se ahé mó á nchun mé ntyág,* se ápen. Ayāle nzé abelé nê, né mím méhōd káōη ntyág rýéd, mím mémăd asyoge ntyág-ke ámpē mbéb. Bon bétédéé mím mékōlē, béhé á ntyág mékōlē-te.”

Nsedtéd tâηgene

Mbwε-mé-nkóme-áte

(Mat 12.1-8; Luk 6.1-5)

23 Mbwε-mé-nkóme-áte nhóg Yesue atómé'áá á nzag e ngun-tê. Ambé ne ábē bembapεε. Ade békagké nê, dóo ábē bembapεε bébóótédé e'sóg é' ngun apád.

24 Héε Befarisia bélâηγεé Yesue bán, “Nōné', cheé ékáá bon ábōη bembapεε bébele dyam áde mbéndé ébageé kunze ábel á mbwε-mé-nkóme-áte?”

* 2:22 Ntyág mímě bébénlé ngob e nyam móo bébénládtaá pónde eched.

²⁵ Yesue antimtén bó aá, “Nédē nyéēlāā’ é mbêd á kálag e Dyöb dyam ádē kâḥ Dabide ámbenlé ádē bétógé chöm éche bédyágkē ne ádē nzaa ékóbé mó ne ábē bad-ε?”

²⁶ Ansól á Ndáb-e-Dyöb á pónde echē Abyataa ábédé prise ambáámbáa. Andyé e’wele ábe é’bédé nde e Dyöb. Boḥ eched mbéndé eébageé mod ké nhóg kunze ádyē ábē e’wele étōmēé Prise. Mwēn andyé ábē-’ε kááḥne bad ábe bēnwōón mó donḡe.”

²⁷ Dóo Yesue ásógtēé aá, “Dyöb dénsēbē moonyon ahag, boḥ áttidē epun éche békōmmēē áte. Enkēnsébēé epun atii boḥ áhagé moonyon aá ákōmme áte échē epun.

²⁸ Né-óó, Mwān-a-Moonyon awóó nkamlen kááḥne ámīn e mbwe-mé-nkóme-áte.”

3

*Yesue achōḡté mod
awē ekáá éwédé*

(Mat 12.9-14; Luk 6.6-11)

¹ Héε Yesue átímé ámbid á ndáb e mekáne. Mod abédé áhed awē ekáá éwédé.

² Bad behóg ábe bēbédé áhed bēhédé’áá Yesue awusé akóben. Né-óó bēnóné’áá Yesue chodchod, ányín nzé áđđid ane mod bwām á mbwe-mé-nkóme-áte.

³ Héε Yesue álāḡgēé ane mod aá, “Hyē étyéem á’sō hén!”

⁴ Dóo Yesue ásedtéé ábē bad aáken, “Nyéláa me ké édé mbéndé ábel mboḥ á mbwe-mé-nkóme-áte, káa ábel mbéb. Edé mbéndé áson alongé á mod, káa áwúu mó?” Boḥ bēnkēnhóbpé dyamdiam.

⁵ Anwóg ndutul á nlém-tē bwāmbwam áyāle ábāb e’lel bé nlém á abum. Héε ánóné bó ne

melĩᅇgá, boŋ álāᅇgē ane mod aá, “Sálé ekáá áte.” Asále áde ane mod ásánlé ekáá áte, ekáá êndyεé mó bwám ámpē.

⁶ Hée Befarisia bébídé á ndáb e mekáne, boŋ békē bétānē bad bé epepé éche Ηερωδε, ábwōg-ábwōg bóbōo béhəgké Yesue áwúu mó.

*Ndun e mod ehidé
Yesue á edib é Galilia*

⁷ Yesue ne ábē bembapεε bēnhidé békē á edib é Galilia. Ndun e mod enhíd mó áwed. Abē bad bémbíd á mbwōg e Galilia, á Judeya,

⁸ á Jerusalem, á mbwōg e Idumeya, á mbwōg echē edé échíníí eped é Jodan, ne á myad míme médé benben ne myad mémháá mé Tíre ne Sidon. Abén bad bépágé’áá wée Yesue áyāle bēnwōg mam míme ábélé’áá.

⁹ Bad bēmbuú áte nyaa echē echabé ámín. Né-óó, Yesue anláá ábē bembapεε aá béboŋsen bōle ábel boŋ bad béekaŋnán mó.

¹⁰ Ammād ekud é bad ahood, né-óó bad bésyāēl bēmpēe ábe békónlé’áá bēbuné ape wée ádíí, ásitēn mó ábel boŋ bēdyεε bwám.

¹¹ Póndé téé echē e’dəádəŋ bé mbéb ábe é’bédé bad áte bényinnē mó, é’bélé’áá bad ábe é’díí áte béhūnē ásē, é’bōnē-ε bán, “Wε-εé edé Mwān a Dyōb!”

¹² Yesue ansím bó etúu áte aá bélāᅇgē bad nyaa e mod eche módíí.

*Yesue apwεdé bembapεε
dyóm ne bébe*

(Mat 10.1-4; Luk 6.12-16)

¹³ Hée Yesue áchəgké á ekone mín, áchēnlē bad ábe áhédé’áá, boŋ bépəg áwē.

14 Dóo ápwédé bad dyôm ne bébe ábé ne mó, áchagé bó aá bembapεε bé nlómag ábe álōmmē-’ε ákal eyale é Dyöb.

15 Ambäg-ke bó ngíne ábíded bad e’dáádəŋ bé mbéb áte.

16 Abê bad dyôm ne bébe bébédéε: Simōne awe Yesuε ânchuu’é mbəŋ aá Petro;

17 Jemse bó mwānyan Jōne, băn ábe Zebēdie, (ábe Yesuε ânchuu’é mbəŋ aá Bwanegεse, awě adé bán, Băn bé ngin.)

18 Andreya bó Filibε, Batolomyo, Matyo, Tōmasε, Jemse mwăn awě Alfōse, Tadiose, Simōne awě ambé á epepé é kán e alon,

19 ne Judas Iskariōde awě antīm Yesuε asóm.

Béchágé Yesuε bán Belzebule

(Mat 12.22-32; Luk 11.14-23, 12.10)

20 Héε Yesuε átímé á dyad. Ekud é bad ênkaán ámpē nyaa echě Yesuε ne ábē bembapεε bénkênwóngé pón dé ádyé ndyééd.

21 Ade Yesuε baányan béwógé nê, bēnkě mó ahead, átéd mó áswên mó á ndáb áyāle bad béhóbé’áá nén bán, “Nló méēsáa’é mó áte.”

22 Donje dé bemeléede bé mbéndé ábe bémbíd á Jerusalem béhóbé’áá bán, “Belzebule adé mó áte. Ene kâŋ e e’dáádəŋ bé mbéb chō ebagé mó ngíne ábíded bad e’dáádəŋ bé mbéb áte.”

23 Héε Yesuε áchénlé bó bon ákanlé bó ngan aáken, “Chán Satanε áhele se abídéd Satanε?”

24 Nzé bad bé alon ahóg békábné áte, bon nchemtén méēsě, ádé alon déeheléé atyéem.

25 Nzé abum á ndáb-pe ákábné áte, bon nchemtén méēsě, ádé abum á ndáb déeheléé atyéem.

26 Né-ᵋᵋ, nzé nkamlɛn ní Satan ríkábne áte, boŋ bɛn ne bɛn béwane, nímé nkamlɛn méebemmé, mékwɛ, nípē-’ε ásōg.

27 Né dᵋᵋ mod eéhɛlɛɛ se asól á ndáb e ngíne-e-mod se ádūm ábē bwēm ésebán asébpé mᵋ ahaŋ. Amaa-’áa mᵋ ahaŋ, boŋ atéd ábē bwēm é’syāāl.

28 Ne mbále nlānge nyé nén mɛé Dyōb délagsɛn bān bé baányon mbéb nisyāāl níme bébélé káŋne nzyāŋ ké ehéé eché bébidté á nsāl.

29 Boŋ kénzɛé awɛ ahóbé e’bébtéd é’ mekan tāngene Edáádəŋ éche Esáá, éekudté alagsɛn mbéd. Abelé mbéb níme mééwᵋo alagsɛn.”

30 Yesue anhób nén áyāle bad béhóbé’áá bān, “Edáádəŋ é mbéb édé mᵋ áte.”

Yesue nyaá ne baányan

(Mat 12.46-50; Luk 8.19-21)

31 Héé Yesue nyaá ne Yesue baányan bépédé, bétyéém é ebwóg-te, boŋ bélōmē mᵋ achəg.

32 Ndun e mod enlāgnéd Yesue. Béndyɛé ásē. Dᵋᵋ bélāngɛé mᵋ bān, “Echōŋ nyon ne baányon bédé á ebwóg-te béhede wɛ.”

33 Héé Yesue ásedtɛé bó aáken, “Nzɛé adé echēm nyan, benzɛé-’ε bédé bānned?”

34 Dᵋᵋ Yesue ánənéé bad ábe bélāgnédé mᵋ nê, boŋ áhōbē’ áá, “Echēm nyan ne bānned bóᵋ bɛn!

35 Kénzɛé awɛ abele mam níme Dyōb áhɛdɛé adii mwānned, abé-’ε echēm nyan.”

4

Ngan e mbál-e-bū

(Mat 13.1-9; Luk 8.4-8)

¹ Yesue ambootéd bad ayáged ámpē á nkəg mé edib é Galilia. Bad ábe bēnləɲéd mós bēntōmtēn abuu áte, nê dēmbəl asól á bəlɛ-tē ádyēē áwēd-te. Abē bəlɛ bēmbē á edib-tē. Ene ndun e mod chó-ε enlyəg á nkin mé edib.

² Abēnládtáá ngan ayáged bós mekan híin. Ankalé bós ngan aá,

³ “Nyéwóglēn! Nkwel-é-nzag nhóg ankě mbál asob á nzag-tē.

⁴ Ade ásobεé mós nê, donge dénhūn á nzii-tē, menən mēmpě mémad mós asōmted.

⁵ Donge dénhūn á meláá-tē wée ndəəb énkēmbuú’é áte. Enwāmsēn abíd ásē ngáne ndəəb énkēnchabpé ásē.

⁶ Boɲ née enyēn é ngine épédé ényāād ábē bwēm é’wé-’ε, áyāle nkan ménkēnsónlé bós á ndəəb-tē bwām.

⁷ Mbál mēmpēe ménhūn wée mekōd médíí. Née mekōd mē mékwógé, mékán akwog áde ábē bwēm, nê ábəl bēnkēnchyáá’é.

⁸ Boɲ donge dé mbál dénhūn á ndəəb e bwām. Mmén mbál mémbid ásē bwām, ríkwōg, ríchyáá-’ε. Donge dé e’sóg dénwālē móom mé mbum meláán, donge móom ntóób, ábíníí-’ε, mbwókəl.”

⁹ Yesue ansógéd enén ngan aá, “Kénzée awē awóó metúu, áwóge’.”

*Nzəm echě ekəá boɲ Yesue dkalé ngan
(Mat 13.10-17; Luk 8.9-10)*

¹⁰ Ade Yesue ályágé mwēmpēn, ábē bembapεε dyōm ne bébe ne bad ábe bēmbē ne mós, bēnlāā mós bán átógned bós échē ngan.

11 Hée Yesue álângeé bó aá, “Dyöb ábágé nyé kunze ábíi kun e nkamlen nímē, boŋ ne bad bémpēe abele aá béwóge’ nímén mekan mésyāal dāsō á ngan-tê.

12 Abelé nê, ábel boŋ,
ké bényīnē ké nyínén, béechemé,
ké béwōgē ké wógén béēsōŋtān áyāle
nzé básōŋténé né bétimén Dyöb, békūd-te alagsen
dé mbéb.”

*Yesue atógké ngan e nsob a mbál-e-bū
(Mat 13.18-23; Luk 8.11-15)*

13 Dóo Yesue ásedtēé bó aáken, “Nédē nyéesōŋtēnēé enén ngan-ε? Nzé nyéesōŋtēne chó chán-nō nyémwēé échíníi ngan asōŋtēn?

14 Nsob-a-mbál awéne eyale é Dyöb.

15 Doŋge á bad bédé nēŋgáne mbál míme ríhúné á nzii-tê. Nzé béwóge’ eyale é Dyöb ábwōg-ábwōg Satan abelé áhye ahúd bó chó á nlém-tê.

16 Abíníi bédé nēŋgáne mbál míme ríhúné á meláá-tê. Béwóge’ eyale é Dyöb, ábwōg-ábwōg békōb-pe chó ne menyīnge.

17 Boŋ échē eyale éwēnnāādtē bó á nlém-tê, bédúbpe-’ε chó dāsō á esōŋ é pón dé. Né-ōó, nzé ndutul ne metake bépédé áyāle échē eyale bédol yāl ámbīd ábwōg-ábwōg.

18 Abíníi-’ε bédíi nēε mbál míme ríhúné á mekōd-te. Bédíi bad ábe béwóge eyale é Dyöb,

19 boŋ mpúlé mé nkōŋsé ne adəŋ dé abud á bwēm awōŋ, ne ahəd á bwēm bémpēe ákán bó nlém áte nyaa echē béehelée e’pum achyáa.

20 Boŋ bad ábe bédé nēŋgáne mbál míme ríhúné á ndəəb echē eboó yāl, bédíi bad ábe béwóge’ eyale é Dyöb, békōb-pe chó, béchyāā-’ε e’ sóg ábe é’wánlé

mesonjé mé mbum móom méláán, móom ntóób ne mbwókel.”

*Nzé béchodé etrukánj béekonjéé chó
(Luk 8.16-18)*

²¹ Héε Yesue ásεdtεé ene ndun e mod aáken, “Mod asónléε etrukánj échě áamáá achod á ndáb-te, ábānē chó á ebwog-sé ké’ε á anonj sé-ye? Saá á atii dé etrukánj mín dóó ábelé ábānē chó?

²² Chǒm ké éhéé éche ékónjédé ébíd á enyεn. Ké éhéé-’ε éche békúténé bédibé chó.

²³ Kénzεé awě awóó metúu, áwóge’.

²⁴ “Nyétonj chǒm-εε nyéwógεé anonj áte bwâm! Melemlem mé nhəgtéd míme ébenlédé wée wěn móó Dyǒb dómpē débēnlédte, ábenléd-te mó tómaa ngáne wēmbēnlédte wée wěn.

²⁵ Kénzεé awě awóó nsōnjen ní kun é nkamlen ní mín, Dyǒb débād mó mímé nsōnjen abε. Ane awě mó-’ε eewóó, Dyǒb dékobén mó kááne mwāmpin awě awóó.”

Ngan e mbál-e-bū

²⁶ Yesue ambé áhóbe aá, “Nkamlen ní Dyǒb nídii nēngáne mod awě akií mbál-e-bū asob á nzag-té,

²⁷ átīm ámbíd á ndáb, nkuu ákūne’, mūte ábelé míme nsón. Ene pónDé esyáál, mbál ébide ásē, ékwoge’ ésebán abíε’ ngáne nē ábenladte.

²⁸ Ndóob chēn-εé ebele bonj bwēm é’kwogé’, é’chyā-’ε e’pum. Nlóm ní byaá móó nsēbpe abíd, ámbíd e pónDé mbwéem kááne ásōg, e’sóg bómpē é’bíd.

²⁹ Bonj nzé e’sóg é’máá awúu, ábwōg-ábwōg ane mod ábelé atéd páá áke dé apád áyāle pónDé echě bēpadéé epedé.”

Ngan e mbál míme ríchiné

(Mat 13.31-32, 34; Luk 13.18-19)

³⁰ Héε Yesue áhóbεé ámpē aáken, “Cheé déhεléε-σε déhagtén nkamlen ní Dyöb-ē? Ngan ehéé débεnlédté echē ēlūmēd ngáne mímé nkamlen rídí-yε?”

³¹ Ndíi nēngáne mbwé e mbál-e-bū echē mod átédé bon ásob á nzag-tē. Mbál-e-bū edé mwāmpín bwāmbwam nzé béhagténé chó ne mbál mémpēe míme rídé á nkōjsé.

³² Bon nzé ékwógé, ékale’ tómaa e’sum* é’syāēl, éwóo-’ε ngen éche menon méhyagké mūm alón áte.”

³³ Yesue akānlé’áá bad eyale é Dyöb, ábenláád ekud é ngan émpēe nēngáne échén. Akānlé’áá bó nyaa echē bésōjtēnnē.

³⁴ Eékanle’áá bó áde éebenlédeé ngan, bon nzé anlyǎg mwēmpen ne ábe bembapεε aláá bó mam mésyāēl míme échē ngan éhóbεé.

Yesue ahóódté ekukud

(Mat 8.23-27; Luk 8.22-25)

³⁵ Echē epun dēn ngukél, dōo Yesue álāngεé ábē bembapεε aá, “Syáá déchabe pεd e edib eníní.”

³⁶ Héε ábē bembapεε béchénné ene ndun e mod bon bésōlē á bōle-tē wéε Yesue ámbēē bon békεεné mó. Myǎle mémpēe mémbē áhed.

³⁷ Abwōg-ábwōg dōo ekukud é ngíne ébóótédé atóm, bon mendíb mésōlē á bōle-tē nyaa echē bōle bēmpōnné asú á mendíb sé.

³⁸ Yesue ambé á bōle-tē á pεd e mbíd. Annaá ásē ábānē nló á mbóngé mín, ákūne’. Héε bényemεé

* **4:32** Bän bé mel néε ndón.

mó ásē, boŋ bēlāŋgē mó bánken, “A meléed, weewóó’έ we pónδέ έε syánē dédíí á kwééd-te-yε?”

³⁹ Hέε Yesue átyéémé ámín boŋ ákännē éché ekukud áte aá éhóó, aláá-’ε mendíb aá mésud. Ekukud énsōg awan, ekíde-’ε éhóótéd áte.

⁴⁰ Hέε Yesue áseɗteé bó aáken, “Cheé ékээ boŋ nyéwōgē mbwóg? Nyéewóó’έ adúbe kээŋ ne bəəb-ε?”

⁴¹ Boŋ mbwóg ménkōb bó bwāmbwam, bésɗté nhóg ne aníníí bánken, “Ebál e mod éhéé chén éche kээŋne ekukud ne mendíb bėwógneé?”

5

*Yesue achōŋté mod awe
awóó e’daádəŋ bé mbéb
(Mat 8.28-34; Luk 8.26-39)*

¹ Yesue ne ábē bembapεε bēmpě á pɛd e edib eníníí, á mbwóg e Gerasin.

² Ade Yesue ábíde á bǎle-tê bídén, amboméŋ mod awě abíde á soóbaɗε. Edəádəŋ é mbéb émbē ane mod áte.

³ Á soóbaɗε dóó ádyéé’áá. Modmod enkēnhenlé mó abane á mehan ampē, ké ne bengəbėngəbē.

⁴ Ayāle ngen ne ngen, bėháá’áá mó ne e’pwəg ne bengəbėngəbē boŋ ké nê aselé’áá bengəbėngəbē áhentéd-te e’pwəg bē áte. Antómtén ngíne awón nyaa echē modmod éhele’áá mó abwəge.

⁵ Atamnádtáá á soóbaɗε ne á e’kone-tê nkūu ne mŭte, ábōnē e’saad ákweltáad-te yəl ne meláá.

⁶ Ane mod abédé mwă etŭn áde ányíne Yesue. Hέε ányógté mehélé, boŋ ábwōgē mebóbóŋ áwē e’só-te,

⁷ ábōnē esaád é ngíne, áhōbē aá, “A-Yesu, Mwän a Dyōb á Ngum, cheé sóo déwónné? Ncháa wε á đĩn á Dyōb μεé weekógsán με.”

⁸ Ane mod anhób nê áyāle Yesuε anláá edáádəŋ é mbéb aá, “A-edáádəŋ é mbéb, bíd ane mod áte!”

⁹ Dóo Yesuε áσεdτεέ mó aáken, “Chán đĩn ádíí wε?” Ankwentén aá, “Đĩn ádíí με bán Amudτεε, áyāle sēbuú áte.”

¹⁰ Ambé áchāā Yesuε aá eénānē’ ábê e’dáádəŋ bé mbéb ene mbwóg.

¹¹ Bəəb-pəə, sənkalaa a esəg é nguú chό’ε ébédé benben ne áhed, édyāg medyé á mbám mé ekone.

¹² Héε ábê e’dáádəŋ bé mbéb é’cháa’é Yesuε bán, “Lóm sé á nguú-tê wê, émwε sésól chό áte.”

¹³ Héε Yesuε ábágé bó kunze bon é’bíde ane mod áte. Abíd áde é’bíde ane mod áte é’slē échē nguú áte. Echē esəg ébédé dyam e’kálé é’ nguú é’be. Abwōg-ábwōg échē esəg émpādē ásē, ényəgté’ á eláá é nkin mé edib-é-nzab, éhún á edib-tê, éhó’ε.

¹⁴ Benən bé nguú béntōm mehélé á dyad-tê ne á mebwóg níme médé benben, ákale bad dyam áde ábénlédé. Ábê bad bémbíd áke dényĩn.

¹⁵ Ade bepédé wéε Yesuε bon bényĩn ane mod awē ndun e e’dáádəŋ bé mbéb émbēε áte, néε ádyéé ásē, ahédé’ε bwēm á yāl bwám, adyéé’ε sen, mbwóg ménkōb bó.

¹⁶ Bad ábe bényĩn áde dyam bénlāā ábê bad ngáne émbenlédte ne ane mod awē e’dáádəŋ bé mbéb bémbēε áte. Bénlāā’ε bó dyam áde ábénlédé ne échē esəg é nguú.

¹⁷ Héε ábê bad bébóótédé Yesuε achán bán ásyəə áwab mbwóg.

18 Ade Yesue ásóléé á bǎle-tê, ane mod awě e'dǎádǎŋ bé mbéb bémbēē áte nê ancháŋ mó aá búmō békag.

19 Boŋ Yesue enkênkwenténné. Anláá mó aá, “Súé’ áwōŋ dyad, éke éláa áboŋ bad ndǎle e dyam eche Sánŋwéé ábénlé wε ne ngáne ápédé wε ngol awóg.”

20 Hê dóo ane mod áhídté boŋ ákag á mbwóg e Dekapolis.* Akanlé mod té dyam áde Yesue ábénlé mó. Bad bésyāāl ábe bénwōg, yǎl enkóm bé áte bwāmbwam.

*Yesue achōŋté mmwaád nhóg,
ápūūd-tε Jauruse mwǎn
(Mat 9.18-26; Luk 8.40-56)*

21 Yesue antim ámbíd á pεd e edib eníníí ne bǎle. Ade ápédé á nkin mímíníí, ndun e mod enkaŋnén áhed.

22 Dóo mod nhóg awě akamlan ndáb e mekáne awě béchógé’áá bán Jauruse ápédé áhed. Anyín áde anyiné Yesue, ankwě ásē áwe mekuu.

23 Ne mechánŋgé mé ngíne áhōbē aá, “Awem mwǎn a mmwaád awág. Sōn, hyě ébân mó ekáá á yǎl, ábel nén ádyεε bwām, ábé-’ε á alongé.”

24 Héε Yesue áhídé mó. Ekud é bad éhídé’áá Yesue nyaa eché bēnkaŋnénné mó.

25 Mmwaád nhóg-ke ambé áhed awě anwōŋ nkole míme mekií mébídé’áá mó á yǎl pónde ésyāāl. Mmê nkole míbédé mó á yǎl á etūn é dyōm-a-mwé ne míbe.

* **5:20 Dekapolis:** adii mbwóg e myad dyóm.

26 Atagé hiin á mekáá mé bad bé e'bo, abébed-te ngáb esyáál echē ánwōngē, boŋ ké nê enkēndy'é'ē bwâm, nkole mbādē bādén.

27 Anén mmwaád anwóg mam míme Yesue ábélé'áá, dóo ábíde mó ámbíd átíntē ene ndun e mod boŋ ásitán mó nkobe.

28 Ayāle anhób áwe nlém-tê aá nzé mósiténé ké míme nkobe, né móodyéé bwâm.

29 Asiten áde ane mmwaád ásiténé Yesue nkobe, mekií míme mébíde'áá mó á yǎl ménsēlē, awóg-ke á yǎl aá móchoó.

30 Abwōg-ábwōg Yesue ambíi aá ngíne ebíde mó á yǎl. Hê dóo ákúnnéde átíntē ene ndun e mod, boŋ ásedtē aáken, “Nzée asiténé me nkobe?”

31 Dóo ábē bembapeé békwentanné mó bánken, “Née ényíneé bad békáŋné we á yǎl nén ésedtē' weé ken nzée asiténé we-ye?”

32 Ké nê, Yesue ambé ánōné' ekíde ányín mod awē asiténé mó.

33 Héé ane mmwaád ábóótédé anəŋ ne mbwóg áde ányíne chōm-éé ébenlédé mó. Dóo ápédé wée Yesue boŋ ákwag mó á mekuu, álāngē mó mbále esyáál.

34 Héé Yesue álāngéé mó aá, “A mwān-a-mmwaád, adúbe ádōŋ ádíde we bwâm. Kǎg ne nsəŋ. Ndutul echōŋ chó-'é émaa.”

35 Ade Yesue áhóbéé nê, dóo bad behóg ábe bébíde á ndáb wée Jairuse bélāngéé Jairuse bán, “Awōŋ mwān amaá mó awé. Cheé étōgnéé Meléede ataged?”

36 Boŋ Yesue enkéntédte dyam áde béhóbé née dyam. Héé álāngéé ane mod a nkamlen aá, “Weewógé mbwóg! Dúbé dúbpén.”

37 Yesue enkëmmwée aá mod ampée áhíd mó étōméé Petro ne Jemse bó mwānyan Jōne.

38 Ade bépédé á ndáb wée Jairuse dōo ányíné mpuuté, awóg-ke mewé mé ngíne míme bad béchyé'.

39 Héé ásólé á ndáb-te boŋ ásədté bó aáken, “Cheé ékáo boŋ nyébelé' nímén mpuuté, nyéchyé-’e mewé? Ane mwān eewédeé, akúne kúnén.”

40 Boŋ bēmbotéd mó awōo. Ambídéd bó mod asyáál á ebwóg-te. Antéd ane mwān sáá bó nyan ne ábē bembapεε béláán, bésōl á toŋ echē ane mwān ámbēē áte.

41 Héé Yesue áchəngé ane mwān á ekáá, boŋ álāngē mó aá, “Talíta kŭm,” (awě adé bán, “A-mwān a ngəndéε, nlānge wε meé, hidé ásē.”)

42 Ane mwān anhidé ásē ábwōg-ábwōg, ábootéd-te akε. (Abédé dyōm á mwě ne mbε.) Yāl enkóm bó áte híin áde nén ábénlédé.

43 Héé Yesue ásíméé bó etúu áte aá béelāngē mod-mod dyam áde ábénlédé, aláá-’ε bó aá bébe ane mwān ndyééd.

6

Bad bé Nazaret béekobéé Yesue (Mat 13.53-58; Luk 4.16-30)

1 Yesue anhidé adé hōm, asú áwē dyad nchoo ne ábē bembapεε.

2 Néε mbwε-mé-nkóme-áte nípédé, ambootéd ayóged á ndáb e mekáne. Bad híin bémbē áhed. Ade béwógé áde ayóge yāl enkóm bó áte. Bésədté bánken, “Héé mó ábídne nímén mésyāāl-ē? Ndín e debyéé éhéé bébágé mó nén? Chán ámwagké nímén menyáké abel-é?

³ Kíné saá kápéntaa ádíi-ye? Saá mwän awě Maria nén-ε? Kíné saá Jemse, Josebe, Judase ne Simone bóo bédé baányan-ε? Baányan bé bebaád bésyāāl-le ámpē béedyéé'é ádyad-tē hén ne syánē-ye?" Né-óó, bēnkóó Yesue.

⁴ Dóó álângeé bó aá, "Nkal e'daádəŋ awóo' edúbé hōm ásyāāl étóméé áwē dyad, áwē túmbé-te ne áwē abum á ndáb."

⁵ Eéheleé menyáké ké mehóg abel áhed, étóméé nguse é bad bé nkole ábe ábáné mekáá á yäl, bédyēē-ε bwám.

⁶ Yäl enkóm mó áte bwāmbwam ne adúbe áde bad bēnkēnwóngé.

*Yesue alómé bembapεε dyôm ne bébe
(Mat 10.5-15; Luk 9.1-6)*

Dóó Yesue ákíi á myad mésad níme médé benben, áyāgtē bad.

⁷ Anchélé ábē bembapεε dyôm ne bébe. Anlād bó áte, alóm bó bébe ne bébe. Ambě-ε bó kunze ábíded bad e'daádəŋ bé mbéb áte.

⁸ Anlyágtén bó aá, "Nyéewánlé chōmchōm á eke étóméé ntón. Nyéewánlé ndyééd ké'ε ekwe, mod eesóó-ε mōné á mesó mé abad.

⁹ Nyéhê metámbe bon nyéewánlé mbóté ébe."

¹⁰ Ambád aá, "Ndáb ké ehéé echě ekobé nyé nyédyēē áhed kóŋ ne pónde echě nyéhidteé áde dyad.

¹¹ Nzé nyēpedé dyad áde béekobeé nyé, káa béekwenteneé nyé awóglen, nyétēdē dó, nyékūd-te ebumbú á mekuu, álúmed nén bán échab ebébtéd éñone bēn."

¹² Né-óó, bēnkě békalé' eyale é Dyōb bán bad bétede ádad abé dé mbéb.

13 Bém̄bīdēd bad e'dəədəŋ bé mbéb híin áte, bēwəgtē bad bé nkole híin ne dyǒg dé menzab, béchōōd bó.

Kwééd echě Jone, Ndusene
(Mat 14.1-12; Luk 9.7-9)

14 Bəəb-pəó, Herode anwóg mam mésyāēl nime Yesue ábélé'áá. Ayāle mam mé bwām nime Yesue ábélé'áá mēmbēl ambyēen hōm ásyāēl. Donje á bad bēhóbé'áá bán, “Jone, Ndusene apuúde. Néé ákээ boŋ awóŋ ngíne ábel nímén menyáké mésyāēl.”

15 Bém̄pēe bēhābē bán, “Elaijaa móódé.” Abíníí-'e bán, “Adíi nkal e'dəədəŋ nēŋgáne nhóg átíntē e bekal bē'dəədəŋ ábe bēmbē se' bəóđ.”

16 Ade Herode áwógé nē anhób áá, “Jone, Ndusene awē mēmbenlé boŋ bésēl nló móódé. Atimé ámbīd á alongé.”

17 Herode anhób nē áyāle anlóm bad áá békōb Jone, bēhaŋ mó, bēhé-'e mó á mbwəg. Ambel nén áyāle Herodyase, mwaád awē mwānyan, Filibe ánsēbēē awóŋ, anwóŋ mó.

18 Jone alánge'áá Herode pónde tée áá, “Weewóó'ē kunze áwóŋ Herodyase, mmwaád awē mwānyon.”

19 Né-óó, Herodyase anhíi Jone pél á nlém-tē, áhedé-'e áá mówúu mó. Boŋ Herode ambēl enkēnhenlé.

20 Herode ambé mbwóg áte tēŋgene Jone áyāle ambíi áá adíi mod a bwām awē asáá. Né-óó akəŋgé mó bwām, ábel boŋ dyam dé mbéb déebenlád mó. Adээ'áá mó awóglen kénée édíi bán pónde tée nzé anwóglén mó, atagé'áá áte á mewēmtēn-tē bwāmbwam.

21 Káōηne á asóg, Herodyase ankūd nzii echē áhédé'áá. Nén ábédé epun-ée Herode ábélé'áá ngande áwēmtēn epun-ée ánchyaādtē. A ngande wē, Herode anlébé ábē bad bémbáá bé ngómena, bad bémbáá bé sánze, ne kase é bad é mbwag á Galilia.

22 Echē epun mwān a mmwaád awē Herodyase anhyē aság esáke. Nē dénwōgēd Herode ne ábē beken menyinge. Né-óó, Kāη Herode ansedéd ane mwān a mmwaád aáken, “Cheé édáá wéé míbe wé? Měbě wé kéchéé échē éhedéé.”

23 Nén démbēl ammwé melě, álāngē mó aá, “Mmwág melě méé, měbéé wé kéchéé éche éhedéé. Ké eped é mbwag échēm échē ríkamlanné.”

24 Né-óó ane mwān ankě nyaá aseded aáken, “Cheé méhedénné mó?” Dóó nyaá átímténé mó aá, “Hedén mó nló míme Jōne, Ndusene.”

25 Héé ane mwān átímé ámbíd ábwōg-ábwōg wée kāη, boη álāngē mó aá, “Bāg me nló míme Jōne, Ndusene á taplēt-te hén bōob.”

26 Nén dénwōgēd kāη Herode ndutul bwāmbwam, boη ngáne ámmadté melě amwé á'sō wée ábē beken, enkēnhēnlé mó nló míme Jōne abáan.

27 Héé álómé sánze póg aá épēen nló míme Jōne. Ene sánze enkě á ndáb e mbwag, esél Jōne nló,

28 épēen míme nló á taplēt-te, ábē ane mwān a mmwaád. Ane mwān a mmwaád mó-'e ábe nyaá.

29 Ade Jōne ábe bembapēe béwógé nē, bēmpě, bétéd mó ndim, béke bélime.

*Yesue adídté e'kále é' bad é'taan
(Mat 14.13-21; Luk 9.10-17; Jōn 6.1-14)*

30 Bembapεε bé nlomag ábe Yesuε ánlōmmē bēnhūu bétán móbéláá-'ε mób mekan mēsýāēl míme bēbélé ne míme béyágté.

31 Ekud é bad épágé'áá wée Yesuε ne ábē bembapεε bétimé-'ε ámbíd nyaa echē Yesuε ne ábē bembapεε benkēnwóngé etál ádyé ké ndyééd. Dóo Yesuε álângeé ábē bembapεε aá, "Syáā détim á ahánge á hōm. Bon nyékóme áte mwāmpīn."

32 Hē dóo bésólé á bǎle-tē, bon bétimé' á ahánge á hōm.

33 Ekud é bad énnýin áde békagké, bēnchēm-me bóbábwōg-ábwōg. Abē bad bēmbíd myad ne myad, békēēn mekuu, bényāgēd á'sō ne mekuu, bésébé apε wée Yesuε ne ábē bembapεε békágé'áá.

34 Ade Yesuε ábídé á bǎle-tē bon anyin ene ndun e mod, antómtén bób ngol abé áyāle bēbédé néε ndyōη mí mbód míme méēwōo nnōn. Né-ō ambootéd bób ekud é mekan ayáged.

35 Ade bīn é'bóótédé ahín, ábē bembapεε bémpǎ áwē, bēhābē nēn bán, "Hén ádé á etún-tē, póndé emaa-'ε atóm bwāmbwam.

36 Láá ábén bad bétimé' á myad-tē míme médé benben, ábel bēn béchan medýé míme bédýēē."

37 Bon Yesuε antimtén bób aá, "Nyé bób nyébe bób chōm éche bédýēē." Héε bésēdteé mób bánken, "Ehede wéé séke séchan e'wεle é' mbwókkel é kábpe ébe, * sébe bób, bédýē-yé?"

38 Héε ásēdteé bób aáken, "E'wεle é'tāη nyéwóó? Nyéke nyénōn." Ade bémáá anōn dóo bēlângeé mób bán, "E'wεle é'dé é'tāan ne súu ébe."

39 Héε Yesuε álângeé ábē bembapεε aá bēbel bad,

* **6:37 Mbwókkel é kábpe ébe:** ébédé nsábe mí mod nhóg áyāle ngan waam.

békaben áte monje ne monje bédyεε á nkəákəə m̄n.

⁴⁰ Né-ɔ́ ábe bad bēndyέé ásē, donje á monje, mbwókel é bad, donje-'ε móom mé bad métáan.

⁴¹ Hē dɔ́o Yesue átédé ábē e'wεle é'táan ne échē súu ébε, ánoné ám̄n, ásāgnān Dyób, ákabtáád bó áte, bon ábagé ábē bembapεε aá békabpe ene ndun e mod. Ankabé-'ε ábē bad kááñne échē súu ébε.

⁴² Moosyáál andyé, akód-te.

⁴³ Bembapεε bēnlád e'wεle ne súu éche ênlyǎg ásē, enlón e'lón dyóm ne é'be.

⁴⁴ Mesonjé mé baachóm ábe bēndyέ ene ndyééd mém̄bē e'kálé é'táan.

*Yesue akii á mendib m̄n
(Mat 14.22-33; Jón 6.15-21)*

⁴⁵ Melelem mé pónde Yesue anláá ábē bembapεε aá bésól á bǎle-tē, békag á'sō á Betsaida, á múde mé edib-é-nzab m̄m̄n̄í. Ade békagké nē, anláá ene ndun e mod aá bésūē' áwab mendáb.

⁴⁶ Ade Yesue amáá bó alyágtēn, anchágé á ekone m̄n, ákáne.

⁴⁷ Néε ngukél épédé, Yesue ábē bembapεε bēmbēēn bǎle át̄intē e edib, Yesue-'ε abé á nkin mwēnpēn.

⁴⁸ Annyín aá ábē bembapεε bétage ákεεn bǎle áyāle epub é ngine émbid bó á'sō-te. Né-ɔ́, dyam-éε adé epog-ne-ngwa ankě bó atán, ákag á mendib m̄n. Ahédé'áá aá mótóm bó ám̄n.

⁴⁹ Bon anyín áde bényiné akag á mendib m̄n, bēnwēmtēn bán nwú m̄ɔ́o n̄dé. Héε bēbóótédé abón.

⁵⁰ Bébóné'áá áyāle áde bényiné m̄ɔ́, mbwóg ménkōb bó moosyáál bwāmbwam. Abwōg-ábwōg

Yesue anláá bó aá, “Nlém méēhūnē nyé, mēé ndé. Nyéebáá’.”

⁵¹ Hée ásólé á bǎle-tê wée bémbēē, epub-pe énsōg atóm. Yǎl enkóm ábe bembapεε áte bwāmbwam.

⁵² Yǎl enkóm bó áte áyāle bēnkēnsónténné chōm-ée menyáké níme āmbenlé ādīde e’kálé é’ bad é’tāan nílúmtéé. Bēnkēnhenlé-’ε achem.

*Yesue achōjté bad
bé nkole á Genesarēt
(Mat 14.34-36)*

⁵³ Née béchábpé edib-é-nzab, bēmpě á múde nímíní, á mbwóg e Genesarēt. Ahed-taá bēntāá-’é bǎle.

⁵⁴ Bébídé-’aá á bǎle-tê bíden bad béchēm-me Yesue.

⁵⁵ Hée bényágté mbwóg áte esyāál bēpēmē bad bé nkole á mekále mīn, békeεné’ hōm téé áde bēnwōgkē bán Yesue adé.

⁵⁶ Hōm téé-’ε áde Yesue ánkeé, á myad mémbáá ne mésad, ne wée bad bélóó á nzag-tê, bad bēpééné-’aá bad bé nkole wée bad bēbúdé aladen á dyad-tê ākáb nyongé. Née bēmpéénné bó, béchāā mó bán āmwε bad bé nkole bēsiten ké mesó mé mbóté nímē. Né-ǎó bad bé nkole bésyāāl ábe bēnsitén níme mesó mé mbóté bēndyεé bwām.

7

*Ayáged dé betaa
(Mat 15.1-9)*

¹ Befarisia ne donje dé bemeléede bé mbéndé ábe bēmbíd á Jerusalem bēnləηnéd Yesue āwóglen mó.

² Bénnyīn bán donge dé bembapεε ábe Yesue bédyāg medyé ne mekáá mé mbinde, nédē béewobpe'áá mekáá nyaa echě Befarisia béhóbéé bán bétāngéné awobe.

³ Befarisia ne bad bé Israel ábe bélyágé ásē bésyāā́l béhīdē ayáge áde bēnkudté wée ábāb betaa. Béedyāgkē ndyééd ésebán béwóbpé mekáá nyaa echě etāngéné.

⁴ Póndé echě mod ábídeé á dyon-tē, eedyāgkē chōmchōm ésebán asébpé yāl awobe. Mbéndé édé-’ε ámpē híin échě béhídeé, nēngáne awobe á bwēm bwām. Bwēm nēngáne kōb, mbeé, kúmbe é e’kii, ne bwēm née mebéndé.

⁵ Héε Befarisia ne bemeléede bé mbéndé béεdtéé Yesue bánken, “Cheé ékáá bonj ábōj bembapεε bééhīdē’ ayáge áde ábēd betaa bétédnédé sé? Bédyāg ndyééd áde béewopεé mekáá nyaa echě éhēdnadté.”

⁶ Yesue antimtén bó aá, “Nkal é’dāódəj Yesayaa antāngén áde ánhōbpē ne e’yale ábe Dyōb dénlōmēnnē mó tēngene nyé bedog-badé, ngáne éténlédé nén,

‘Abēn bad bébage mε edúbé é nsəl ngēn, bonj mímab nlém méesaá áwēm.

⁷ Edúbé éche bébageé mε éesaá dyamdiam, áyāle béyāgte bad áhíd mbéndé é baányonj byánán édii mbéndé é Dyōb.’

⁸ Nyētēdté mbéndé é Dyōb bonj pεn nyéhíde ayáge á baányonj.”

⁹ Héε Yesue ábádeé aá, “Nyēbenlad mwane áteude mbéndé é Dyōb ábel nén nyéhíde ayáge áden dēn.

¹⁰ Mosεε ahóbé aá, ‘Béé sóó ne nyonj edúbé.’ Ahób-pe ámpē aá, ‘Kéznéé awě ahóbé sáá ké’ε nyaa dyam

dé mbéb áyāl bétāngéné béwúú mǎ.’

¹¹ Boṅ nyéyágte nén bán nzé mod awóó chǒm éche ántāngēnnē sáá ké’ε nyaá awōngēn boṅ ahóbé aá, ‘Échén chǒm édé Kóban,’ (Nê adé bán édii chǒm é Dyǒb),

¹² né eewóó’ε nzǒm áwōngēn sáá ké’ε nyaá.

¹³ Né-ǒǒ, ádê ayáge áde nyébagéé bad ábélé nyéetédéé eyale é Dyǒb nées dyaṃ. Mam médé-’ε ámpē híin nées nímén níme nyébeleé.”

*Mam níme mébele boṅ
mod eesáá’ á’sǒ é Dyǒb
(Mat 15.10-20)*

¹⁴ Héε Yesuε áchēnléé ene ndun e mod boṅ álāngē bó aá, “Nyéwǒglēn, nyésōṅtēn-nε mε.

¹⁵ Chǒmchǒm éesaá éche ébide á ebwǒg boṅ nées ésólé mod áte ébel mó abé mbinde á’sǒ é Dyǒb. Boṅ chǒm échē ébide mod áte chǒǒ ébele boṅ abé mbinde á’sǒ é Dyǒb.”*

¹⁷ Yesuε anchené ene ndun e mod, asól á ndáb-te. Dǒǒ ábē bembapεε bépédé boṅ bélāngē mó bán átānled bó ene ngan.

¹⁸ Héε Yesuε ákwēntanné bó aáken, “Nyémpē nyéesóṅtánné-yε? Nyéenyínéé nén bán kéchéé éche ésólé mod áte, éche ébidé á mbíd e ebwǒg, éebeléé-sε mod abé mbinde á’sǒ é Dyǒb-ε?”

¹⁹ Ngáne ésóléé mod áte, éepagké mó á nlém-tê. Ebelé ésud mó dásǒ á abum-tê ébid-tε.” (Yesuε anhób nê álúmed nén aá ndyééd ké ehéé eboó adyé.)

²⁰ Ambád aá, “Chǒm échē ébidé mod áte chǒǒ ébele boṅ eesáá’ á’sǒ é Dyǒb.

* **7:15** Doṅge á kálag dé’sǒ ábádé nchoo 16: “Kéznzé awē awóó metúú áwǒg.”

21 Ayāle, á nlém ní mod-tê dṓo mewêmtēn mé mbéb nêṅgáne akáb dé mésón, echīb, ne ewúen bébídéé. Mmê mewêmtēn mṓo mébelte mod mbéb.

22 Akáb dé mésón á ndáb e'wóngé, abé dé metog, ne abel á mam mé mbéb mémpēe nêṅgáne edogké, ábel mbinde é mekan, akón á bad, akal á bad metóm áyāl, abé á kúmbe ne abel dé e'yóké é mekan.

23 Mmén mam mé mbéb mésyāāl mébide mod á nlém-tê mébelé-'e mod eesáá' á'sō é Dyōb."

*Adúbe dé nken-a-mmwaád
(Mat 15.21-28)*

24 Dṓo Yesue ásyáṅgé bonj ákǎg á eped é mbwóg echē enchiitén myad mé Tire ne Sidon. Héé ásólé ndáb póg, eéhe'de'aá-'e aá modmod ábíi aá módē áwēd-te. Ké nê bémbē bébíi.

25 Néé mmwaád nhóg awē edāádəṅ é mbéb ébédé awe mwān a mmwaád áte áwógé bán Yesue adé áhed, ampě ákwē-'e mṓ á mekuu.

26 Ane mmwaád abédéé mmwaád a alonj á Grikia awē béchyáá á ped e mbwóg e Siria echē béchágéé bán Fonisia. Héé ácháa'é Yesue aá ábíded mwān échē edāádəṅ é mbéb áte.

27 Bonj Yesue ankwentén mṓ aá, "Sé sébe sédíde bēndem. Eesáá bwām átéd ndyééd e bānbān ábwēme mbwé."

28 Ane mmwaád ankwentén aá, "Nê dēn a-Sánj, bonj káəṅne mbwé echē edyéé á tébele-sé ebélé edyéé píúted é medyé éche bēndem béhúnté."

29 Dṓo Yesue álāṅgéé mṓ aá, "Ayāle échén ehób éche éhóbé nén, ehéle ésūē wē á ndáb. Edāádəṅ é mbéb éche ébédé awonj mwān áte étédte mṓ."

³⁰ Né-ɔ́, ane mmwaád ansú á ndáb, atán nêṅgáne mwän ánánḡé á anən mīn. Echê edəədəṅ é mbéb êmmăd mó atede.

*Yesuε achōṅtē mod awě
eewógne'aá, eehóbé'aá-'ε dyam bwâm*

³¹ Héε Yesuε áhídté á mbwóg e Tirε, átimé á Sidon á pɛd e edib é Galilia, átimnád á pɛd e mbwóg e Myad Dyôm.

³² Bad behóg bêmπεέν mod áwē awě eewógne'aá, eehóbé'aá-'ε dyam bwâm. Abê bad bénchāṅ Yesuε bán ábān ane mod ekáá á yǎl.

³³ Héε Yesuε áhídnédé mó wéε ene ndun e mod édíi boṅ átimēn mó á ahánḡé á hōm. Ansóléd memii á metúu níme ane mod, ásob meléed boṅ ásitén mó echém.

³⁴ Héε Yesuε ánóné ámīn, áheeméd áte, boṅ áhōbē aá, “Efáta,” nê ádé nén bán, “Dibnéd.”

³⁵ Abwōg-ábwōg, ane mod ábootéd-te awógen, echém étyéém mó á nsəl, ábootéd-te dyam ahób bwâm.

³⁶ Héε Yesuε ásiméé bó etúu áte aá béētúbpé modmod ádén akan dīn. Boṅ pónδέ téé echě áhóbé aá béehóbé', bó-'ε bénabpé bó ahób hóbén.

³⁷ Bad bésyāāl ábe bénwōg, yǎl enkóm bó áte nyaa echě echabé ámīn bwāmbwam. Béhóbé'aá bán, “Abele' mam mésyāāl bwâm. Abele káṅne bad bé ndóg béwógne', ábele-'ε e'bóbé é'hōbē dyam.”

8

*Yesuε adídté e'kálé é' bad é'niin
(Mat 15.32-39)*

¹ Mmê mesú mën ndun e mod empée empě wée Yesue. Ngáne bénkênwóngé chõm-ée bédyágkē, Yesue anchélé ábē bembapεε, álāngē bó aá,

² “Ndé enén ndun e mod ngol áyāle békébē ne me e’pun é’láán, béēwóo-’áa chõm éche bédyákē bəəb.

³ Nzé nsúúténé bó nzaa bəəb, né béhūn ásē á nzii áyāle bó donge á bad béchábé abíd.”

⁴ Héε ábē bembapεε bétimtanné mó bánken, “Héé mod áhele ákud ndyééd á ehyáŋge-tê hén echē ěkwōg ábēn bad adyé-yε?”

⁵ Yesue ansedéd bó aáken, “E’wεle é’tān nyéwóo?” Bēnkwentén bán, “E’wεle saámbé.”

⁶ Dóo álāngéé ene ndun e mod aá bédyεε ásē á ndəəb-tê. Héε átédé ábē e’wεle saámbé, ásāgnān Dyōb, ákabtád bó áte, ábagé ábē bembapεε, bó-’ε békabpé ene ndun e mod.

⁷ Bénwōŋ-’ε baá nguse bé súu ésad. Yesue anaméd chómpē. Amaá-’aá chó anamed, ábagé bembapεε aá békabe bad.

⁸ Bad béndyē ene ndyééd, békód-tε, káŋn élyāg-kε ásē. Echē enlyōg ásē enlón e’lón saámbé.

⁹ Mesongé mé bad níme méndyē ene ndyééd mébédé dyam e’kálé é’niin. Yesue ansúúd ábē bad áwab mendáb.

¹⁰ Asúúté-’aá bó súútén, asól-lε mó á bǒlε-tê ne ábē bembapεε, békē-’ε á mbwóg e Dalmanuta.

Befarisia béhεde’ e’chemléd
(Mat 12.38-42; 16.1-4)

¹¹ Befarisia bēmpě wée Yesue bébootéd mó apentεn, béhεdné mó e’chemléd ábe é’húú ádyōb. Bébélé’áá nê ákəg mó.

12 Héε Yesue áhéémédé áte, boŋ áhōbē aáken, “Cheé ékáo boŋ nyonɣel e’chii éhéde e’chemléd? Ne mbále, nlánge nyé nén meé, nyonɣel e’chii éekudté e’chemléd ké’ ehóg.”

13 Héε áchénné bó, boŋ ásōlē á bōle-tê, átimé á ped e edib eníní.

*Esulten é Befarisia
(Mat 16.5-12)*

14 Bōob-póó, áde bembapεε ábe Yesue bésólé á bōle-tê, bēnchatén e’wεle awále áyāl. Ewεle ehóg chēmpeŋ chóó bēnlyagnédte á bōle-tê.

15 Héε Yesue álânɣéé bó aá, “Nyétéd pónde ne esulten é Befarisia ne éche Herode.”

16 Dóó békaléé bēn ne bēn bán, “Ahóbé nê áyāle deewānléé e’wεle áyāl.”

17 Yesue ambii chōm éche bēhóbeé, héε áseɗteé bó aáken, “Cheé nyéhóbeé áyāle e’wεle ábe nyéewōo’é? Kááŋ ne’ bōob nyéebii’é ké’ε nyéesōŋtenéé-yε? Chán nyélélé nlém á abum nén?”

18 Nyêwóó mǐd, nyéenyínnéé-yε? Nyêwóó-’ε metúu nyéewógnéé-yε? Kááŋne bōob nyéekamtánné-yε?

19 Ade mēnkabpé e’wεle é’táan ádíde e’kálé é’ bad é’táan, e’lónj é’tánj e’wεle ábe bēnlyag ásē ábe nyēnladté bēnlōnnē?” Bēnkwentén mó bán, “Dyōm ne é’be.”

20 Ambád bó asɛded ámpē aá, “Ade mēnkabpé-’ε ewεle saámbé ádíde e’kálé é’ bad é’niin, e’lónj é’tánj e’wεle ábe bēnlyag ásē ábe nyēnladté bēnlōnnē?” Bēnkwentén mó bán, “E’lónj saámbé.”

21 Ambád bó asɛded aáken, “Boŋ ké nê nyéesōŋtenéé-yε?”

Yesue achõjté mod awě akwedé ndím

22 Yesue ne ábē bembapεε bēmpě á Betsaida. Ahed dõ bad behóg bépééné mod awě akwedé ndím áwē, boḡ béchāā mó bán ábân mó ekáá á yǎl.

23 Yesue ancháá ane mod á ekáá, áhidnéd mó á dyad-tê wê. Ansob mó meléed á mǐd, abán mó mekáá á yǎl, boḡ ásedté mó aáken, “Enyíne chõmchõm-ε?” 24 Héε ane mod ánóné ámín boḡ áhõbē aá, “Nnyíne bad boḡ bényínnad n̄ḡgáne mel níme mékag.”

25 Héε Yesue ábáné mó mekáá á mǐd ámpē. Dõ ane mod ákídté an̄n, mǐd mēndibnéd mó, ábootéd-tε anyínεn bwám.

26 Yesue ansúúd mó á ndáb, áhõbē aá, “Wětõgné-ε asól ádyad-tê ámpē.”

Yesue mó adé Ane-awě-Béwógté

(Mat 16.13-20; Luk 9.18-21)

27 Yesue ne ábē bembapεε békágé’áá á myad níme médé á mbwóg e Kaisaria Filipi. Bépédé-’aá á nzii wê, dõ ásedtéé bó aáken, “Nzé-módé bad bó béhóbεé bán ndé?”

28 Héε békwentanné bán, “Donḡe á bad béhóbe bán edii Jõne Ndusεε, bēmpēe bán Elaijaa, ábíní-ε bán nkal é’dáod̄ḡ nhóg.”

29 Dõ ásedtéé bó ámpē aáken, “Boḡ nyébēn-εe nzé-módé nyéhóbεé bán ndé?” Héε Petro ákwentanné mó aá, “Wεé edé Ane-awě-Béwógté.”

30 Ade Petro amaá-’aá ahób nê, Yesue ansím bó etúu áte aá béelāḡgē modmod nyaa e mod echē módíí.

Yesue ahóbé t̄ḡḡene metake níme

ákudté ne kwééd echē áwēε

(Mat 16.21-28; Luk 9.22-27)

³¹ Yesue ambootéd ábē bembapεε ayáged, áhōbē aá, “Mwǎn-a-Moonyon atánǵéné ákūd metake híin. Bad bémbáá bé dyad, beprise bémbáá ne bemeléede bé mbéndé bēbān-’ε mó á yǎl. Bēwūū mó, bon e’pun ábe é’lonténé é’láán, āpuú.”

³² Yesue anhób ádén dyam nyaa echē énkēnkonédtté bó mbále ké póg. Héε Petro átímné Yesue á nkag, bon ákagé átímed mó áte.

³³ Bon Yesue ankuné, ánōn ábē bembapεε. Dóo ákánné Petro áte aá, “Hidé me á’sō-te, a-Satan! Mmon mewēmtēn méesaá mewēmtēn mé Dyōb, médii mewēmtēn mé moonyon.”

³⁴ Dóo Yesue áchénlé ene ndun e mod ne ábē bembapεε, bon álāngē bó aá, “Kéznzéé awě adəá me ahíd, ásob yǎl mendíb, ápēm-me ádē awog áhíde me.

³⁵ Ayāle kéznzéé awě ahede ádē alongé ason ābōd dó. Kéznzéé-’ε awě abódé ádē alongé ayāle echēm ne ayāle nímén nkalan ní bwām né ákud alongé áde déemaá’.

³⁶ Nsyáá nǵhéé mod ákudté nzé akudé nkōǵsé nisyāal bon abódé ádē alongé.

³⁷ Cheé mod áhεεε ábε ákōde ádē alongé?

³⁸ Kéznzéé awě ákwāgēn me ne ábēm e’yale á nyongel e’chii echē ehídne Dyōb nlém níbe, abé-’ε ebébtéd, Mwǎn-a-Moonyon mó ámpē ákwāgēn mó á pónde echē ápéé ne ángel échē ésáá ne ehúmé éche Sáá.”

9

¹ Héε álāngéé bó aá, “Ne mbále, nlānge nyé nén méé, donge á bad átíntē echēn béenyínénne kwééd díd áde bényíneé née nkamlēn ní Dyōb nǵpédé ne ngíne.”

*Yǎl ehǎhǎléné Yesue
(Mat 17.1-13; Luk 9.28-36)*

² Ambíid e epun ntóób Yesue ankeén Petro, Jemse ne Jonε á mbɔɔd echě echabé ámin. Běmpen-éé bémbē áhed. Awāb e'só-te hê dɔɔ ábē bembapεε bényíné néε Yesue áhǎhǎléné.

³ Mbóté éche ánhēē épené áte, épūbē-'ε féréd. Epúbé'áá nyaa echě modmod á nkōhsé éehéléé-se apúbed.

⁴ Héε bényíné Mosεε ne Elaijaa bébídé tǎléd, bɔɔbe Yesue békale'.

⁵ Dɔɔ Petro álǎngéé Yesue áá, “A meléed, ébóó ngáne syáá dédíí hén. Délōh e'bem é'láán, échōh, éche Mosεε ne éche Elaijaa.”

⁶ Petro enkēmbíí'ε chōm éche áhóbéé áyāle mbwóg ní ngíne níme mémbe bɔɔbe baáb á yǎl.

⁷ Hê dɔɔ mbag ékúténé bó boh ehób-pe ébídē' á mbag-tê wê nén, “Awem Mwǎn a nlém nén, nyéwógne mó.”

⁸ Abwōg-ábwōg dɔɔ bénóné ekide boh béenyíne modmod ampée nzése Yesue.

⁹ Ade bésudeé á mbɔɔd mín nê, Yesue ansím bó etúu áte, álǎngē bó áá, “Nyéelǎngé modmod dyam áde nyényíné káōh ne á pónde echě Mwǎn-a-Moonyoh ápuú'ε.”

¹⁰ Né-ɔɔ, ábē bembapεε bēnkoó áde dyam ne bēn, bésedté yǎl chōm-ée mpuu nídíí.

¹¹ Héε bésedtéé Yesue bánken, “Cheé ékáá boh bemeléede bé mbéndé béhóbé nén bán Elaijaa atǎngéné asébe dé ape boh Ane-awě-Béwógté ǎpě?”

¹² Dɔɔ átimtanné bó áá, “Ne mbále Elaijaa atǎngéné asébe dé ape atíí-'ε mam mésyāāl. Cheé-ā ékáá boh étenléd á kálag e Dyōb nén bán Mwǎn-

a-Moonyonj akũd metake híin, bad bébáŋ-’ε mɔ á yǎl?

¹³ Bonj nlánge nyé nén mɛé Elaijaa ammad aɓe, bémbɛl-ε mɔ ngáne béndəŋgé. Nê dénlônéd mam míme mēntenléd áyāl e eché.”

*Yesue achõhté mwǎn
awě edǎdɔŋ é mbéb étagtɛé
(Mat 17.14-21; Luk 9.37-43a)*

¹⁴ Ade bépédé wée ábíníi bembapɛɛ bébédé, béntān née ndun e mod éləŋnédé bɔ. Bemeléede bé mbéndé bépéntānnáá ne bɔ.

¹⁵ Anyín áde ábê bad bényíné Yesue, menyáké ménkōb bɔ bwámbwam. Bēnnyəgéd áwē àleled mɔ.

¹⁶ Héε Yesue ásedtɛé ábē bembapɛɛ aáken, “Cheé nyáábɔ nyépentanné?”

¹⁷ Dɔɔ mod nhóg átíntê e ene ndun e mod ákwentanné aá, “A-meléed, mpɛéné awēm mwǎn a mwɛnchóm áwōŋ áyāle edǎdɔŋ é mbéb édé mɔ áte, ébéle eehóbéé-’ε dyam.

¹⁸ Nzé ékóbé mɔ, ébéle éhūnéd mɔ ásē, mehod-tɛ mébídé mɔ á nsəl. Ene pónédé ádyāg mesonj á nsəl, anámén-nɛ. Nlánge-’ε ábōŋ bembapɛɛ mɛé bébídéd mɔ chó áte bonj béeheléé.”

¹⁹ Dɔɔ Yesue ákwentanné aá, “Wáá, nyé bad bé’ chii, nyéewóó’é adúbé. Chán mépɛé nyé adyɛn hén-ēē? Chán mépɛé nyé awɛsén-é? Hyɛnád mɛ mwǎn awed.”

²⁰ Dɔɔ bépíinédé mɔ ane mwǎn. Anyín ádê éché edǎdɔŋ é mbéb ényíné Yesue, ênsɔg ane mwǎn, éhūnéd mɔ ásē, áhəŋlād á ndɔɔb, mehod-tɛ mébídē mɔ á nsəl.

21 Héε Yesue áseǵtεé sáá aáken, “A etùn é pónǵé éhéé ákétagké nén?” Dóo sáá ákwentanné aá, “Bootya se á mwëndemé.

22 Eyógké mó ahúned á muú-te ne á mendíb-te áwúu mó. Boη nzé dyam ádé áde éhéεé-se ébel, ewóg sé ngɔl, ewóηgén sé.”

23 Héε Yesue átímténé mó aá, “Wεé nzé dyam ádé áǵé nheεé se mbel-ε? Chǵm ésyāǵl éhele ébenled ne mod awě awóó adúbe.”

24 Abwǵg-ábwǵg dóo ane mwǻn sáá ákánté ehób ámǻn aá, “Ndúbǵpé, wóηgén adúbe áǵem áde déekwognede.”

25 Ndun e mod enyǵgté’áá áladen áte áhed. Ade Yesue ányíné nê, ankáné éché edǵǵǵǵ é mbéǵ áte aá, “A-edǵǵǵǵ é ndóg ne é ebóbé, nkamlan wε mεé ébǵd mó áte, weesólé-’ε mó áte ámpē.”

26 Eché edǵǵǵǵ éléǵǵpé-’aá esaád, éságéd ane mwǻn ne ngíne, ébǵd-te. Ane mwǻn antǵm née ndim ní mod káǵη donje á bad béhǵbē bán, “Awédé.”

27 Boη née Yesue áchǵηgέ mó á ekáá, áǵǵǵdē mó ámǻn, ane mwǻn atyéém-mε.

28 Yesue ansól á ndáb-te. Héε ábē bembapεε béseǵtεé mó á kun-tê, bánken, “Cheé ênkǵη boη sênkênhǵl éché edǵǵǵǵ é mbéǵ abǵded?”

29 Ankwentén bó aá, “Mekáne mwěmpen móo méhele mébǵdéd enén ndín e edǵǵǵǵ.”

*Yesue ahábé ámpē tâηgεne eche kwééd
(Mat 17.22-23; Luk 9.43b-45)*

30 Yesue ne ábē bembapεε béhǵdté-’aá hê, bépōη á mbwóg é Galilia. Enkênmwaá aá modmod ábíi wéε módǵíí,

31 áyāle ayágté'áá ábē bembapεε aá, “Bébě Mwǎn-a-Moonyon á mekáá mé baányon. Bó-'aá bėwū mó. Nzé bémáá-'ε mó awúu āpuú ámbid e epun é'láán.”

32 Bon ábē bembapεε béenkēnsóhténné chōm éche ánhōbpē, bėbáá'áá-'ε mó aseded.

*Nzéé atómténé mod ambáá abé?
(Mat 18.1-5; Luk 9.46-48)*

33 Yesuε ne ábē bembapεε bēmpě á Kapenahum. Ade bėpédé, bėnsōl á ndáb-te. Dóo Yesuε ásedtéé bó aáken, “Cheé nyéswántánnáá á nzii bwéed?”

34 Bon bėnkēnhóbpé dyamyam áyāle bēn ne bēn bėpéntánnáá tǎngene mod awě atómténé mod ambáá abé átínté echáb.

35 Hée Yesuε ádyéé ásē, áchagé ábē bembapεε dyōm ne bėbe bon álāngē bó aá, “Kėnzéé awě ahede mod a mbáá abé, atǎngéné abé ndimtene, abé-'ε mbaledε a moosyáál.”

36 Hē dóo átédé mwěndem bon átíidē mó áwab tínté. Dóo abwáádé ane mwǎn, bon áhōbē aá,

37 “Kėnzéé awě akobé enén ndín e mwǎn á dín ádēm, né akobé mε. Kėnzéé-'ε awě akobé mε, eėkobéé mměn-pen. Akobé kááne ane awě alómé mε.”

*Kėnzéé awě eetǎngán syánē,
né adé ne syánē
(Luk 9.49-50)*

38 Jonε anláá Yesuε aá, “A meléed sēnnyín mod abídte bad e'dáádǎn bė mbėb áte á dín ádōn, sēnláá-'ε mó bán ásōg abel nē, áyāle eésaá mod a echon éche syánē.”

39 Bon Yesuε anláá bó aá, “Nyéelángé mó bán ásōg abel nē. Mod ké nhóg eésaá awě āmad

menyáké abel á dɛn ádêṃ, boŋ ámbid e pónde áhɔbē me mam mé mbéb á yǎl.

⁴⁰ Ayāle, kénzée awě eetəŋgán syánē né adé ne syánē.

⁴¹ Ne mbále, nlānge nyé nēn mée, kénzée awě abagé nyé ké kôb e mendib ámwé á dɛn ádêṃ, áyāle nyédíí bad bé Krísto, atəŋgené nime nsábe akud.

Mekəsgen nime mébelte bad mbéb

(Mat 18.6-9; Luk 17.1-2)

⁴² “Kénzée awě abělté enén ndín e mwəndem echě edúbpé me mbéb, ébē mboŋ átəə mó sáŋkalaa aláá á nkáŋ, béhúnéd-te mó á edib é nkwě.

⁴³ Nzé échoŋ ekáá ébelte we mbéb, esél chó, épim. Edé mboŋ we ákud alongé áde déemaá’ ne eped é yǎl tómaa we áwóŋ mekáá mébe boŋ bébwém we á dŭ-á-muú.*

⁴⁵ Nzé échoŋ ekuu ébelte we mbéb, esél chó, épim. Edé we mboŋ ákud alongé áde déemaá’ ne eped é yǎl tómaa we áwóŋ mekuu mébe, boŋ bébwém we á dŭ-á-muú.†

⁴⁷ Nzé ádoŋ díđ ábelte we mbéb, ehúd dó, épim. Edé mboŋ we ásól á nkamlen rí Dyöb ne díđ ahóg tómaa we áwóŋ míd mébe boŋ bébwém we á dŭ-á-muú.

⁴⁸ Ahed, ‘e’kuu ábē é’dyāg bad béewāgkē, muú nímed-te méédímēē.’

⁴⁹ “Muú ményāā mod ké ahée á yǎl ngáne nkwě rínyāŋgē á ndyééd-te.

* **9:43** Donje á kálag dé’só ábádé nchoo **44:** *Ahed, e’kuu ábē é’dyāg bad béewāgkē, muú nímed-te méédímēē.* † **9:45** Donje á kálag dé’só ábádé nchoo **46:** *Ahed, e’kuu ábē é’dyāg bad béewāgkē, muú nímed-te méédímēē.*

50 Nkwě nǐbóó, boŋ nzé nǐbódé alaŋ, chán béhele-se bényinéd mó ámpē? Nyényine' née nkwě, nyédyεε-'ε ne nsaŋ ne nhóg ne aníníí."

10

*Ayáged tâŋgene anan
dé mmwaád á e'wóngé
(Mat 19.1-12; Luk 16.18)*

¹ Yesue anhidé ádê abwóg á hǒm, ampõŋ á mbwóg e Judeya, áchābē á pɛd e edíb é Jodan eníníí. Ndun e mod epagé'áá áwē, áyāgtē-'ε bó ngáne âmenténné bó ayáged.

² Befarisia bémpě áwē ákag mó. Bênsedéd mó bánken, "Echɛd mbéndé chóchó ebagé kunze nén mod ánan mwaád á e'wóngé-yε?"

³ Héε Yesue átimtanné bó aáken, "Chán mbéndé eche Mosεε ékaleé?"

⁴ Bênkwentén bán, "Mbéndé echě Mosεε ebagé kunze nén, mod áβε mwaád kálag echě elûmte nén bán, e'wóngé é'máá boŋ ánan mó."

⁵ Héε Yesue álângeé bó aá, "E'lel bé nlém á abum ábēn bóó bêmběl boŋ Mosεε áβε nyé échén mbéndé.

⁶ Boŋ se á mbooted, áde Dyõb áhágé bad, anhǎg mmwaád bó mwenchóm.

⁷ 'Né-ɔó, mwenchóm ätedé sáá ne nyan, abé ne mwaád.

⁸ Búmō bad béβε bétim mod nhóg.' Né-ɔó, béesaá ámpē bad béβε, boŋ bédii mod nhóg.

⁹ Né-ɔó, échě Dyõb áládé, modmod eepáá'."

¹⁰ Ade bétimé ámbíd á ndáb-te, Yesue ábē bem-bapεε bênsedéd mó tâŋgene dyam áde áhóbé.

¹¹ Héε Yesuε álângeé bó aá, “Kéńzéé awě anané mwaád boŋ awón mmwaád ampée né akábé asón.

¹² Nzé mmwaád-te atědté nchóm boŋ awóó mod ampée, né akábé asón.”

*Yesuε anǎmté bëndem
(Mat 19.13-15; Luk 18.15-17)*

¹³ Bad bépééné’áá bëndem wée Yesuε bán ábán bó ekáá á yǎl ánamed bó. Boŋ ábē bembapεε bēnkānē ábē bad áte.

¹⁴ Ade Yesuε ányíné nê, anlŋ, aláá-’ε ábē bembapεε aá, “Nyétede bëndem béhyag áwēm. Nyéekáá bó áyāle nén nyaa e bad née bó chóó éwóó nkamlen ní Dyöb.

¹⁵ Ne mbále nlânge nyé nén mεé, kéńzéé awě eékobe nkamlen ní Dyöb nēŋgáne mwëndem, éésónlé áwēd-te.”

¹⁶ Héε Yesuε áládé ábē bán áte, ábānē bó mekáá á nló nhógē-nhógē, ánamté-’ε bó.

*Nhən ní bad ne nkamlen ní Dyöb
(Mat 19.16-30; Luk 18.18-30)*

¹⁷ Ade Yesuε ábwógké eke ámpē, dóó mod nhóg ányágté áwē, abwóg mebólón áwē e’só-te, boŋ ásedté mó aá, “A-meléed a bwām, dyam áhée ntánǵéné abel, ábel nén níkud alongé áde déemaá?”

¹⁸ Héε Yesuε ásedtéé mó aáken, “Cheé ékáá boŋ échǵé me meléede a bwām? Mod ké nhóg eesaá mod a bwām étōmεé Dyöb dēmpen.

¹⁹ Ebíí mbéndé éche éhóbe bán, ‘Weewúé’ mod, weekábé asón á ndáb e’wónǵé, weechíbé’, weebídé mbón e metóm, weédōgē bad, beé sóó ne nyon edúbé.’ ”

20 Héε ane mod áhóbεέ aá, “A meléed, nhídé échéń mbéndé ésyāāl bootya se á mwëndemé.”

21 Héε Yesue ánɔnέέ mó chóón ne nlém mé edəŋge, boŋ álāŋgē mó aá, “Dyam ahóg áhedne wε. Kǎg, ésóm bwēm é’syāāl ábe éwóó, étéd nímé mɔné, éβε betóótókē bé bad. Nzé ebelé nê, wǎkǔd nhɔn ádyōb. Ene pónđé éhyε éhíde mε.”

22 Ade ane mod áwógé nê ansudén, asú-’ε ne ndutul á nlém-tê áyāle ambé nhɔn bwāmbwam.

23 Héε Yesue ákúnné mǐd wée ábē bembapεε boŋ álāŋgē bó aá, “Elél áte bwāmbwam behɔn bé bad ásol á nkamlɛn ní Dyōb.”

24 E’yale áβε Yesue bénkōmēd ábē bembapεε yǎl áte. Ambád ahób ámpē aá, “A-baányan elélé áte bwāmbwam ásol á nkamlɛn ní Dyōb!

25 Edé mwǎn e akan sǎŋkalaa a nyam née Kamēl ápon á epɔn é ndənde tómaa nhɔn mí mod ásol á nkamlɛn ní Dyōb.”

26 Ade bembapεε béwógé nê yǎl enkóm bó áte bwāmbwam. Héε bēn ne bēn béhóbεé bánken, “Nzée-’ō ahele ákud e’soóson?”

27 Héε Yesue ánɔnέέ bó chóón, boŋ áhōbē aá, “Ne baányon nén déehelεé se abenled, boŋ ne Dyōb dyamdyań déelεlé áte.”

28 Héε Petro áhóbεέ aá, “Nɔné’, sētēdté chōm ésyāāl áhíd wε.”

29 Dóo Yesue áhóbεέ aá, “Ne mbále, nlāŋge nyé nén mεé, kénzée awě atēdté eche ndáb, baányan, nyaá, saá, bán ne eche mbwóg áyāl echēm, ne áyāl e nkalan mí bwām,

30 ákǔd tómaa ne nê á alongé dé’ chii. Akǔd ndáb, baányan, bán, ne mbwóg mbwókεl é ngen.

Aküd-te kááŋne metake á ðin ádê̄m. Akud-te alonǵé áde déemaá' á pónǵé échě ehúe'

³¹ Bon bad híin ábe bédé á'sō bōob bélyag mbíd, híin-ne ábe bénylag mbíd bēbē á'sō."

*Yesue ahóbé ngen éche elónténé
éláán ngáne bēwūú' é mó
(Mat 20.17-19; Luk 18.31-34)*

³² Yesue ne ábē bembapere békágé'áá á akuu á Jerusalem, mó-'áá antómén bó. Yǎl enkóm ábē bembapere áte bwâmbwam, mbwóg-ke nkób bad ábe béhídé'áá bó. Ade békagké nê, dōo Yesue átímné ábē bembapere á nkag ámpē bon álāngē bó mam míme mébenléd ne mó.

³³ Héé ahóbéé aá, "Pón nyébii bán dekaǵ á Jerusalem, áwed-taá bēbēé Mwǎn-a-Moonyon á mekáá mé beprise bémháá ne bemeléede bé mbéndé. Bó-'e bēbě mbakú bán atāngéné awé, bēbě-'e mó á mekáá mé bad ábe béesě bad bé alonǵ á Israel.

³⁴ Bēwelé mó, bésobtád mó meléed á yǎl, béswādtāad mó e'tanjú, bēwúú-'e mó. Bon ámbíd e e'pun é'láán āpuú."

*Jemse bó Joné bēhede' e'tál
(Mat 20.20-28)*

³⁵ Ámbíd e nê Jemse bó Jon, bán ábe Zebedie bēmpě wéé Yesue. Ade bépédé, bēnlāā mó bán, "A meléed, dyam áde áde séhedéé bán ébele sé."

³⁶ Héé Yesue ásedtéé bó aáken, "Cheé nyéhedeé bán míbele nyé."

³⁷ Dōo bēhóbéé bán, "Sēhede bán áde wedyéé'é ádōŋ atii dé nkamlen, émwē sédyere wē á nkag, nhóg á ekáá émbháá aníní-'e á ekáá é emwed."

38 Hée Yesue ákwentanné bó aá, “Nyéebii’ é chõm éche nyésedtée. Nyééhël metuné míme mépēm̄mē apém-ε? Nyééhël edusen é metuné éche mékudté akud-ε?”

39 Dóo békwentanné mó bán béhël. Hée Yesue álāngēé bó aá, “Nyéēpēm̄ metuné míme mépēm̄mē, nyéékūd edusen é metuné échě mékudté,

40 boŋ meewóó’ é kunze âpweɗ mod awě ädyéé me á ekáá é mbáá ké’ε á ekáá é emweɗ. Dyõb dóo débě mímē metii wée bad ábe ánábndéé mó.”

41 Ade ábíní bembapεε dyõm béwógé dyam áde Jemse bó Jon bésédté, bēnliín bó bwāmbwam.

42 Hée Yesue áchəgéé bó moosyáál benben boŋ álāngē bó aá, “Nyébíí nēn bán bad ábe bébyééné nēe benkamlenε bé nkõjsé ne bad bémháá bé dyad, bébenlad ngíne ákamlen bad ábe bédé ásē echáb.

43 Boŋ éetāŋgenéé abé nê átíntē echên. Kénzéeé awě ahede aá móbê mod ambáá átíntē echên, atāŋgéné abé mbəledε awên.

44 Kénzéeé-’ε awě äbē mod a’só átíntē echên, atāŋgéné abé ntāŋ a moosyáál.

45 Ayāle ké Mwān-a-Moonyoŋ eépedεé aá bad bébenle mó, boŋ apedé ábele bad, ábe-’ε ádē alongé ákəde bad híin.”

*Yesue achõjté mod
awě ankwε ndím
(Mat 20.29-34; Luk 18.35-43)*

46 Yesue ne ábē bembapεε bēmpě á dyad á Jeriko. Ndun e mod ehídé’áá bó. Ade bémadté dyad áte nê, dóo bétané mod nhóg awě béchágé’áá bán Batimuse. Batimuse abédé-’éé mwān awě Timause. Ankwε ndím. Andyéé á nkəg ní nzii, áchõmē bwēm.

47 Ade áwógé bán Yesue a dyad á Nazarēt móo atóme' nê, ambootéd abón, áhōbē aá, “A-Yesu, Mwän a mbyaa míme Dabide, wóg me ngól!”

48 Bad híin békánne'áá mó áte, bélāngē-'ε mó bán ádib nsəl. Boŋ mó-'ε ambé ábōnē aá, “A-Mwän a Dabid, wóg me ngól!”

49 Héε Yesue átyéémé boŋ áhōbē aá, “Nyéchéle mó.” Dóo béchénlé, bélāngē mó bán, “Weétāgē áte. Tyéém ámín achênle wε.”

50 Héε ane mod ábwémé kóte wíníí, apádé ásē, ápāg-ke wéε Yesue.

51 Héε Yesue ásedtéé mó aáken, “Cheé éhedeé wεé míbele wε?” Ane mod anhób aá, “A-meléed, nhe de méé ínyínen ámpē.”

52 Héε Yesue álāngéé mó aá, “Kāg, adúbe ádōŋ ádíde wε bwām.” Abwōg-ábwōg ambootéd anyínen, áhídē-'ε Yesue.

11

Yesue asólé á Jerusalem née kōŋ

(Mat 21.1-11; Luk 19.28-40; Jōn 12.12-19)

1 Ade Yesue ne ábē bembapεε békwógé ape á Jerusalem, benben ne myad mé Betpeg ne Betani á Ekone é Menzab, anlóm ábē bembapεε bébe á'sō,

2 álāngē bó aá, “Nyékag á dyad áde áde nyé á'sō nê. Nzé nyésólé sólén nyéētán née bétāngé etum é nchóm a ésel awé mod éēđíidēē mbéd. Nyéhune mó, nyéhyεene'.

3 Nzé mod asēdté nyé aáken, ‘Cheé ékás boŋ nyébelé nén?’ Nyéláa mó bán, ‘Sāŋgwéé atógnéné chó, álōm-me chó ámbíd ábwōg-ábwōg.’ ”

4 Héε békíí boŋ bétānē' etum é nchóm a ésel éche bétāngé á mmwε-ń-nzii boŋ béhunné'.

⁵ Hée bad ábe béntyēēm benben ne áhed bésēdtéé bó bánken, “Cheé nyébeléé nê, nyêhunne échê ésel-é?”

⁶ Bembapēē béntimtén bó ngáne Yesuē ánhōbpē aá béhōb. Dóo ábê bad-te bétēdté bó bán békag.

⁷ Bēmpēēn échê ésel wée Yesuē, bétal chó échab mbóté ámīn boṅ mós-’é ádiidé’.

⁸ Bad híin béntál échab mbóté á nzii-tê ábe mós edúbé, ábíníí-’é bésēlē’ e’kikag é’ mií, bétalé’ á nzii-tê.

⁹ Bad ábe békágé’áá mós á’sō ne ábe béhídé’áá mós ámbíd béhágé’áá e’saad bán,
“Hosána, Mekēnag!

Nnam mbê ne ane awě apedé á dīn áde Sāṅgwéé.

¹⁰ Nnam mbê ne nkamlēn míme echēd sāj Dabidē, míme ríhúé’.

Hosána, Mekēnag ne Dyōb áde áde se ámīn!”

¹¹ Yesuē apedé-’áá á Jerusalem, asól á Ndáb-e-Dyōb. Ansimén ekíde ésyāāl. Ngáne pónde émmadté atóm, antīm ámbíd á Betani ne ábē bembapēē dyōm ne bébe.

Yesuē abagé alín á ngəl ebómán

(Mat 21.18-19)

¹² Chān é’bíníí áde béhúé’é á Betani, nzaa enkób Yesuē.

¹³ Annyín alín á ngəl nchabnede ne byaá ámīn. Dóo ákíí áhed ányín nzé móhēle se mósud e’pum áwedé-mín. Ade apédé áhed enkéntánné epum ké ehóg étōméé byaá áyāle enén pónde eebédeé pónde echē ngəl échyáa’é e’pum. ¹⁴ Hée álāngéé ábē bwel aá, “Wéechyáa’é epum ámpē mbéd.” Ábē bembapēē bēnwōg áde Yesuē áhóbé nê.

*Yesue anané bekáb bé nyongé
á Ndáb-e-Dyöb*

(Mat 21.12-17; Luk 19.45-48; Jön 2.13-22)

¹⁵ Yesue ne ábē bembapεε bēmpě á Jerusalem. Ade bépédé, ansól á Ndáb-e-Dyöb, ábootéd-te bad ábe békábé'áá dyön áwēd-te ananted. Ankuné betébelε ábe bad bépénlé'áá mōné ámīn mekuu ámīn, ákūnē-'ε metii nīme bad ábe bésómmé'áá mbəngé mekuu ámīn.

¹⁶ Enkēmmwaá-'ε áá modmod átómēn chōm é nyongé ké ehóg á eyáde é Ndáb-e-Dyöb-te.

¹⁷ Héε áyágtéé bó, áhōbē áá, “Eesaá mbále bán éténléde nén bán, ‘Echem ndáb échəgnéd bán ndáb e mekáne e melon mēsýāēl-ε?’

Boη nyētímté chó mbwəg mé bechíb!”

¹⁸ Bepriε bémbáá ne bemeléede bé mbéndé bēnwōg áde Yesue áhóbé nē, bébootéd-te nzii ahed áwúu mó. Boη bémbē mbwóg áyāle ndun e mod esýāēl echē embé áhed émbē menyáké ne mekan nīme áyágté'áá.

¹⁹ Ade ngukél épédé Yesue ne ábē bembapεε bēnhidé á dyad-tē wê.

Ayáged tāngene alín á ngəl áde dénwē

(Mat 21.20-22)

²⁰ Mbwεmbwε, áde bétiméé ámbíd, bényīn áde alín á ngəl ngáne áwédé kóšəne á nkaη.

²¹ Héε Petro ákámténé dyam áde Yesue ámbenlé, boη álāngē mó áá, “A-Sáη, nōné', alín á ngəl áde wēmbéé ebómán áwédé.”

²² Héε Yesue ákwentanné áá, “Nyédúbe Dyöb ne nlém rísyāēl.

23 Ne mbále, nlânge nyé nén mɛé, kénzée awě äläā enén mbɔɔd aá, 'Hidé ásē, éhûn á edib é nkwe-te' bon adúbé ne nlém nsyāā aá dyam áde móhóbéé débenléd ésebán apide', né débenléd.

24 Né-ɔɔ, nlânge nyé mɛé kéchéé éche mod ásédte Dyöb á mekáne-tê, bon adúbe nén aá móɔkud chó, äkü-d-te chó.

25 Póndé ké ehéé échě étyéémé wɛé mókanné', nzé ewánléné mod melingá, élagsen mós, âbel nén awôñ Titée awě adé ámîn mós-'é ámpē alagsen wɛ mîmon mbéb."*

*Héé kunze eche Yesue ébidé?
(Mat 21.23-27; Luk 20.1-8)*

27 Yesue ne ábē bembapɛɛ bēmpě á Jerusalem ámpē. Ahyómme'áá á Ndáb-e-Dyöb-te. Hê dós beprise bémháá, bemeléde bé mbéndé ne bad bémháá bé dyad bépédé áwē.

28 Dós bésédteé mós bánken, "Kunze ehéé éwóó âbel mímén mekan? Nzé-módé abagé-'é wɛ ene kunze?"

29 Yesue ankwentén bó aá, "Mésédéd nyé dyam ahóg. Nzé nyékwěnténé dós, né mɛ-'é mēläā nyé kunze echě níwóó âbel mímén mekan.

30 Nzéé ambě Jɔne kunze ádusen bad? Dyöb-ɛ ngé baányon?"

31 Běn ne bēn bēmbootéd apentɛn bánken, "Nzé dehóbé nén bán 'Jɔne echě kunze enhúú ne Dyöb,' né ásedéd syánē aáken, 'Cheé-ɔ enkəñ bon nyénkéndúbé mós?'

* 11:25 Donje á kálag dé'só ábádé nchoo 26: "Nzé nyéəlagsán bad bēmpēe mbéb, ké awen Titée awě adé ámîn éelagsénné nyé mîmən mbéb."

³² Bɔŋ nzé dehóbé bán, ‘Echě kunze ehúú ne baányon?’ ” (Béwógé’áá bad mbwóg áyāle bad bésyāāl bēndúbé bán Jɔne abédée nkal é’dáádəŋ.)

³³ Né-ɔ́, bēnkwentén Yesuε bán, “Séebíí’é.” Yesuε mós-’ε antimtén bó aá, “Né ké mε-’ε ámpē méeláá’é nyé kunze echě níwóó âbel nímén mekan.”

12

Ngan e bebel-bé-nsón ábe bébébé nlém á abum (Mat 21.33-46; Luk 20.9-19)

¹ Héε Yesuε ábóótédé ngan abenled âkalen bó. Anhób aá, “Mod nhóg ankwěl nzag e e’pum é’ mel ábe bébenléé mím. Ankág chó, ábel bwāl wée béminéé ábê e’pum é’ mel ábel mím, alon-’ε ebem wée bédyεε’é áwēd-te ânan menon. Ambě ene nzag wée bad ábe bóbóó békăb mbote áte, ákē á alonj démpēe. ² Néε pónde épédé echě bépádée e’pum, ane nwóó-nzag anlóm awě mbaledε wée ábê bebel-bé-nsón âkobe mó ádē asii dé e’pum.

³ Héε ábê bebel-bé-nsón békóbé ane mbaledε, béwānēn mó, bésúúd-te mó ámbíd ne mekáá mé ngên.

⁴ Dóó ane nwóó-nzag álómé mbaledε ampée. Bénlǝgēn mó á nló, béwógéd-te mó e’són.

⁵ Nwóó-nzag ambé alóm mbaledε ampée, ábê bad bēnwūū ane ámpē. Bēmběl melelem ne ekud émpēe, bēbómé donje, bēwūē-’ε ábíníí.

⁶ Mod awě anlyəg mó alóm abédée awe mwān-a-mwenchóm awě ândəŋgé bwâmbwam. Kóəŋne á asóg, dóó álóméé ane mwān ne mewēmtēn nén aá, ‘Ngáne ádíí awem mwān, bēbē mó edúbé.’

7 Boŋ áde ábê bebel-bé-nsón bényíné née ane mwän áhúé'é, dóo bën ne bën béhóbeé bán, 'Ndyé-a-mbwóg nén, nyéhyag déwúu mó ábel nén eche mbwóg ésuuned syánē.'

8 Héé békóbé mó, béwūē' mó, bébwém-me mó ndim ámbīd e e'ké."

9 Héé Yesue ásedtēé aáken, "Βοοβ-ποό, cheé nwóó-nzag ábenlé ábê bebel-bé-nsón? Apě awúú bó, ábē-ε ene nzag wée bebel-bé-nsón bémpēe.

10 Eyale é Dyōb éhóbe nén aá, 'Aláá áde belōŋ-bé-ndáb bēnchenéé, dóo átímé aláá dé etógnén abé.

11 Sāngwée mó abelé nén, édé-ε syánē menyáké á dīd-te. Nyéēláá'é nê-ye?" "

12 Né-óó, bad bémbáá bé Israel béhéde'áá Yesue akób áyāle bémbīi bán áyāle echáb dóo ákálé enén ngan. Boŋ bémbē mbwóg áyāl e ene ndun e mod embé áhed. Né-óó bēntēdé mó bέke.

*Nsedtéd tâŋgene asaa á tááse
(Mat 22.15-22; Luk 20.20-26)*

13 Bénlōm Befarisia ne bad bé epepé éche Herōde áke dé aseded Yesue dyam ábel nén békóben mó awusé.

14 Héé bépédé áwē boŋ bélāngē mó nén bán, "A meléed, sēbīi nén bán ekale mbále. Weékwognádté modmod. Weebáá-ε bad mesó mé mbōm. Boŋ ekoŋte bad mam mé Dyōb ayáged. Mbéndé eche syánē ehóbe nén bán désanŋe' tááse wée Kaisēe, kōŋ e Roma-ye?"

15 Boŋ Yesue anchēm nīmāb medogké, héé ásedtēé aá, "Cheé nyékəgeé me. Nyéhyīined me mōné mé ekii rīnōn mó."

16 Héε bépééné mənέ nímed boη ásədté aáken, “Edídinge éche nzéé chén, dīn áde nzéé-’ε dén?” Bénkwentén mó bán, “Abe Kaisεε.”

17 Dóo álângeé bó aá, “Nyébag-kóó Kaisεε éche édé éche Kaisεε, nyébag-kε Dyöb éche édé é Dyöb.” Ade béwógé nê, yäl enkóm bó áte.

Nsədtéd t̄ηγεne mpuu

(Mat 22.23-33; Luk 20.27-40)

18 Besadusia bēmpě wée Yesuε. Béndübē bán mpuu méesaá ámbíd e kwééd. Dóo béhóbéé bán,

19 “A-meléed, mbéndé e Mosεε ehóbe nén bán, ‘Nzé mod awóó mmwaád boη awédé áde bó ane mmwaád béepedεé mwän awále, mwānyan a abum ahóg at̄ηgéné ane nkúd awónη ábel boη dīn áde mwānyan déēbōō’.

20 Bōob-pōó, bad bébéde mod saámbé ábe bémbíd abum ahóg. Mod a’só anwónη mmwaád boη awé áde bó mmwaád ne béepedεé bán awále.

21 Mwānyan awě anhíd mó anwónη ane nkúd a mmwaád. Mómpē awé áde bó ane mmwaád béepedεé bán awále. Melemlem mé dyam mēmbenléd ne awě alónténé béláán.

22 Káōη bó mod saámbé asyáál bénwōη ane mmwaád béwé-’ε, áde béepedεé mwän awále. Káōηne á asóg ane mmwaád mómpē anwé.

23 Bōob-pōó á pónde e mpuu, mmwaád awě nzéé ane mmwaád áchagnédté áyāle bó moosyáál saámbé bénwōη mó?”

24 Héε Yesuε átimtanné bó aá, “Nyépane’ áyāle nyéesōηtenéé chōm éche eyale é Dyöb éhóbéé, nyéesōηtenéé-’ε ngáne ngíne e Dyöb ésógé abé.

25 Póndé echě bad bépuu'ě ámbid e kwééd, mewóngé méebáá ámpē. Bad bébē nêḡgáne ángel éche édé ámín, béewóngéé.

26 Βοῶβ-ρῶό, t̄ḡḡene mpuu, kíné nyéēláá'ě á kálag e Mosεε á eped échě éhóbe áyāle mwă bwel awě ahyáá'áá-ye? Áhed, éténlédé bán áde Dyōb álāḡḡé Mosεε t̄ḡḡene Abrahamε, Aisigε ne Jakōbe ábe bēmmad awé, Dyōb dénhōb áá, 'Mεé ndé Dyōb áde Abrahamε, Aisigε ne Jakōbe.'

27 Nê álŭmte nén bán bédé á alongé. Dyōb ádíi Dyōb á bad ábe bédé á alongé, saké Dyōb á bad ábe béwédé. Nyêpane' bwâmbwam."

*Mbéndé ébe éche etómténé etógnén abé
(Mat 22.34-40; Luk 10.25-28)*

28 Meléede a mbéndé nhóg awě ambé áhed anwóg chōm éche béhóbeé. Adě ányíne áá Yesuε abagé Besadusia nkwenten mí bwâm, ansedéd Yesuε áá, "A meléed, átínté e mbéndé ésyāāl, mbéndé ehéé etómténé etógnén abé?"

29 Yesuε ankwentén mó áá, "Mbéndé echě etómténé etógnén abé edíi mbéndé echě ehóbe nén áá, 'A-bad bé Israel nyéwóḡlen: Sāḡgwéé áded Dyōb, mwēmpen-éé adé Sāḡgwéé.

30 Edəḡ Sāḡgwéé ádonḡ Dyōb ne nímonḡ nlém r̄isyāāl, ne échonḡ edāádəḡ ésyāāl, ne nímonḡ mewēmten mésyāāl, édəḡ-ε mó ne echonḡ ḡḡine esyāál.'

31 Echě elonténé ébe echě chómpē edé etógnén, edíi echě ehóbe nén áá, 'Edəḡ mwānyonḡ nêḡgáne édáá echonḡ yāl.' Mbéndé empée eésáá echě etómténé etógnén abé nêḡgáne échén ébe."

³² Héε ane meléede a mbéndé álângeé Yesue aá, “A-meléed etângeéné. Ekalé mbáale wεé Dyöb ádíi ahóg, Dyöb démpēe déesaá-’ε étóméé mwēmpen.

³³ Mod áðan-’ε mó ne nímē nlém nisyāāl, ne nímē mewēmten mésyāāl, ne eche ngíne esyāál, áðan-’ε mwānyan ngáne ádáá eche yāl, atómténé etógnén abε tómaa áβε Dyöb mendε níme béhyânτεé ne mendε mémpēe.”

³⁴ Ade Yesue ányíné aá ane meléede a mbéndé ahóbne debyéé, anláá mó aá, “Nkamlen ní Dyöb méechabnedéé wε yāl.” Ámbíd enê modmod enkēnchǔ’ε Yesue dyamdyam aseded ámpē.

*Nsēdtéd tânge ne Ane-awě-Béwógté
(Mat 22.41-46; Luk 20.41-44)*

³⁵ Yesue ayógté’áá á Ndáb-e-Dyöb. Ahed dáo áhóbéé aáken, “Chán bemeléede bé mbéndé béhele béhōbē bán Ane-awě-Béwógté abidé á mbyaa níme kân Dabide?

³⁶ Dabide mwēn anhób áde Edáðan éche Ésáá émbēé mó áte aá,
‘Sân Dyöbε anláá awēm Sán gwéé aá,
Dyεé áwēm ekáá émbáá
káñ ne á pónde echē mébenlé bon
ékógtéd ábōñ bad bé ekoyí ámín ne mekuu.’

³⁷ Néε Dabide mwēn ásébpé mó achæg aá Sán gwéé,
chán-nō Ane-awě-Béwógté áheléé abé awe mwān?”

*Elébé tânge ne bemeléede bé mbéndé
(Mat 23.1-36; Luk 20.45-47)*

Ndun e mod ewóglánnáá Yesue áhed ne menyinje bwámbwam.

³⁸ Ade áyógtéé bó anhób aá, “Nyétêd pónde ne bemeléede bé mbéndé, bédæ’ mengombe níme

ríchábé ahyómēn áte. Bédəə-’ε bán bad bélente bó ne edúbé ésyā́l á mebwóg née á dyən-tē nê.

³⁹ Bédəə-’ε metii mé edúbé adyεε á ndáb é mekáne, bédəη-’ε e’tál bé edúbé á hōm á ngande.

⁴⁰ Bédume’ mbwóg é bekúd, bédogné-’ε bad ntōη-ntōη mé mekáne. Békūd nkógsen míme ríchábé ámin.”

Mende mé nkúd a mmwaád
(Luk 21.1-4)

⁴¹ Yesuε andyεé benben ne ntyág míme behágé’áá mənέ mé mende áte á Ndáb-e-Dyōb, ánənέ’ ngáne bad behāgkē mənέ áwēd-te. Ekud é behən bé bad behágé’áá ekud é mənέ.

⁴² Dóo ntógétōke a nkúd a mmwaád ápédé, boη áhāg mənέ mé ekii míme ndé ké bedáleε bébe.

⁴³ Héε Yesuε áchágé ábē bembapεε benben boη álāηgē bó aá, “Ne mbále, nlāηge nyé meé, mímén ntógétōke mé mmwaád ríhédé mənέ tómaa ábén behən bé bad bésyā́l.

⁴⁴ Mənέ míme ábê bad behédé, ndii mənέ míme ríchóbé bó ásē, boη anén mmwaád ne atóg áde ádíí, ahédé mənέ rísyā́l míme áwóó, rísyā́l míme ámbēē atōgnan yäl.”

13

Yesuε ahóbé aá
bépanjtéd Ndáb-e-Dyōb

(Mat 24.1-2; Luk 21.5-6)

¹ Yesuε ambíd á Ndáb-e-Dyōb. Ade ábidεé nê dóo awē mbapεε nhóg álāηgεé mó aá, “A-meléed nənέ’, meláá ne nlóηtéd ní Ndáb-e-Dyōb mén ríboó bwāmbwam.”

² Yesue ankwentén mó aá, “Enyíne’ échén ngíne é nlóntéd-ε? Aláá ké ahóg déelyəgké ámín e waáb, bépāntéd mó áte mésyāäl.”

*E’bébtéd é’ mekan ábe bébenléd
(Mat 24.3-14; Luk 21.7-19)*

³ Yesue ankĕ adyεε á ekone é Menzab mín. Echê Ekone ébédé á müde ní Ndáb-e-Dyöb. Ahed dóo Petro, Jemse, Jone ne Andreyā bépédé boŋ bēlanġē mó wée bóbōo bēnpēn bēbédé bán,

⁴ “Láá sé pónDé echĕ nímén mam mébenlédte, éláa-’ε sé e’chemléd ábe bēlūmēd bán pónDé echĕ mébenlédte epedé.”

⁵ Yesue anláá bó aá, “Nyétéd pónDé nyēmwāg-ke se modmod ádog nyé.

⁶ Bad híin bépĕ á dīn ádēm bēhōbē bán, ‘Mε-εé ndé Ane-awĕ-Béwógte.’ Bédōg-ke bad híin.

⁷ Nzé nyēwógé bán nzum éwante’ ké’ε nyēwógé nzunze é nzum, nyéētāgē áte. Nén átāngéné abenled, boŋ nê déélūmtēē nén bán asóg ámáá ape.

⁸ Aloŋ ahóg détyēēmēn ádíníí nzum. Nkamlēn nhóg-ke ntyēēmēn nímíníí. Ndōob eēnəŋnéd mebwóg ne mebwóg, nzaa-’ε ěbē. Nén débē nēŋgáne mewε mé’sō níme mmwaád áwógéé nzé aħede achyáa.

⁹ Nzé nímén mam mébóótédé-’ε abenled, nyétédēn yāl pónDé áyāle békōb nyé, bébe nyé á mekáá mé bad bé kóte. Béwanén nyé á ndáb é mekáne, nyētyéém-με á nkáásé á’sō é’ benkamlēne ne kəŋ é bad á yāl echēm. Nén débēnléd ábel nyékale bó nkalaŋ ní bwām.

¹⁰ Bétāŋgéné née bésébpé nkalaŋ ní bwām akal meloŋ mé nkōŋsé áte mésyāäl, boŋ asóg dépĕ.

11 Nzé békóbé-’ε nyé boŋ bépééné nyé á kóte, nyéētāgē áte, áyāle dyam áde nyéhōbpē. Nzé ene pónde epedé, nyéhōb kéchéé echě ébagnéd nyé, áyāle dyam áde nyéhōbpē dēbīd ne Edáádəŋ éche Esáá saké ne nyé.

12 Bad bėbagé baányəŋ á mekáá mé bad bėmpēe áwúu bó. Besáá-bé-bān bėbēl melemlen ne ábab bān. Bān-ne ámpē bėkunnén besáá bóəbe benyáá yəl ábel bėwúu bó.

13 Moosyáəl ákɔɔ nyé áyāl e dīn ádēm. Boŋ kėnzéé awě ákaán nímē metake nlém káəŋ ne á asóg, ákūd e’soosəŋ.”

Dyam dé ebébtéd

(Mat 24.15-28; Luk 21.20-24)

14 “Nyéēnyīn nées ekúkú é akan éche épεene e’són á’sō é’ Dyōb édíí wéε énkéntəŋgėnné abé.” (Nyé ábe nyélaa’ nímén mekan nyésōŋtɛn mó bwām.) “Nzé nyényíné nê, bad ábē bédé á Judeya bétôm mehélé, bėkε bėsəəm á e’kone mīn.

15 Mod awě adé á nnoŋ ní ndáb mīn eétəgné akε á ndáb-te átéd chōmchōm.

16 Mod awě mós-’ε adé á nzag-té, eétimē ámbīd átéd eche síte.

17 Ebē ebébtéd ne bebaád ábe bėbē nkoŋ ne ábe bėmwāŋtē nímē mesú.

18 Nyékānne nén bán, nén déebɛnlád ne nyé á pónde e nkóg áde ahéb ádíí ngíne bwāmbwam,

19 áyāle ndəŋge echě ébē ábē e’pun, ébē ndín echě eébédé mbéd bootya Dyōb áhəge nkōŋsé apε epun é’chii. Dyamdyam nées ádé déebɛnléd-táá ámpē mbéd.

²⁰ Boŋ Sánɣwée amaá ábê e'pun é' metake asél áte. Nzé énkembé nê, né modmod éechonɣé. Boŋ á etutú é bad ábe ápwédé, asélé ábê e'pun áte.

²¹ Ene pón dé nzé mod alánɣé nyé aá, 'Nyénɔne', Ane-awě-Béwógté m̄nén' káa, 'Nɔné' m̄níníí, nyéedúbpé'.

²² Bad híin bébid, bó mod té ákalé metóm aá móo módé Ane-awě-Béwógté. Bekal bé'dáedəŋ bé metóm ámpé bébid. Bébelé menyáké, bélúmté-ɛ e'chemléd híin. Bébel nén ábel boŋ bédog bad ábe Dyöb ápwédé, nzé nzii edé ádog bó.

²³ Nyétéd pón dé. Nlánɣé nyé nímén mam mésyāāl á'sō é' pón dé.

*Epɛ é Mwǎn-a-Moonyon
ne asóg dé nkõŋsé*

(Mat 24.29-31; Luk 21.25-28)

²⁴ "Ábê e'pun-nɛ, áde pón dé e ndəŋge ne étómmé tómén

'etondɛɛ ákwɛ ehíntén,
ngɔn-nɛ esóg apɛn,

²⁵ betintinɛ bébid ámín béhūn ásē,
ngíne-'ɛ éche edé ámín énáŋnéd á e'dii.'

²⁶ Ene pón dé dóo bényínnē néɛ Mwǎn-a-Moonyon áhúé'é á mbag-tê ne ngum ne ehúmé é ngíne.

²⁷ Alóm éche ángel á metónɣé mé nkõŋsé mésyāāl méniiin, álad bad ábe Dyöb ápwédé áte, bootya atónɣé dé nkõŋsé ahóg ápe ádínií.

*Yesuɛ aá bad bétéd
eláŋsén ne alín á ngəl*

²⁸ "Nyétéd eláŋsén ne alín á ngəl. Nzé ngen ébóótédé byaá békāālē abíded, nyêbele nyêbíí bán nchoŋ rídé benben.

29 Melemlem nzé nyênyíné nímén mekan mésyā̀l mébenlad, nyébií nén bán, Mwǎn-a-Moonyon akwogé apɛ, adé-'ɛ benben.

30 Ne mbále, nlânge nyé nén mɛ́é, enén nyonjel e bad ɛ̀dii ebé ámin bon nímén mekan mésyā̀l mébenlád.

31 Nkon ní mín ne nkõhsé bémaá bon ábêm e'yale bébē abé ne abé.

*Modmod eebii'ɛ epun
éche Mwǎn-a-Moonyon ápɛé
(Mat 24.36-44)*

32 “Modmod eebii'ɛ epun pen ké'ɛ póndé eché nímén mam mébenlédté. Ké ángel éche édé ámin éebii'ɛ, ké Mwǎn ámpɛ eebii'ɛ. Titée mwɛmpɛn mó abii póndé eche nímén mekan mébenlédté.

33 Nyétêd póndé, nyébonɛn, áyāle nyéebii'ɛ áde ene póndé épɛé.

34 Ebē nêngáne mod awě anlédé eke akɛ, bon alyágnéd ábē bembaledɛ ndáb, ábe nhóg-téé míme nsón, aláá-'ɛ mod awě anɔne' mmwɛ mé e'ké aá ábele nsón bwâm.

35 Né-ɔ́, nyétêd póndé áyāle nyéebii'ɛ póndé eché Sǎngwéé a ndáb ápɛé. Ahɛle ápɛ ngukél, ké'ɛ melúde, ké'ɛ epɔg é mbwɛmbwɛ, ké'ɛ mbwɛmbwɛ.

36 Nzé apedé tǎléd eetángenéé née átáné née nyékúnéé.

37 Né-ɔ́, saké nyé bɛnpɛn nílangéé ádén dyam bon nlânge moosyā̀l mɛ́é, ‘Nyétêd póndé.’ ”

14

*Béhagke Yesu
(Mat 26.1-5; Luk 22.1-2; Jɔn 11.45-53)*

¹ Enlyǎg e'pun é'be, Ngande e Nnyíme-ámìn ne e Ewele-é-Ngên ápe áte. Bepriε bémbáá ne be-meléede bé mbéndé béhágé'áá mwane ákób Yesue á mesom-tê, áwúu mó.

² Bonj bénhōb bán, “Deébēlē nê á mbwε ní ngande áyāle né bad bépēén epuutéd.”

*Béwógté Yesue á Betani
(Mat 26.6-13; Jōn 12.1-8)*

³ Yesue ambé á Betani á ndáb wéε Simone awē ankwē nkole mé meləŋ. Ade ádyágkē ndyééd nê, dōo mmwaád nhóg ápédé ne apom á dyǎg dé elod é bwām áde dēnlēl nkun bwāmbwam. Adē dyǎg bébēnlé dō nād. Hê dōo ákógté nló mé epom bonj ásyogé Yesue áde dyǎg á nló.

⁴ Bonj donje á bad ábe bébédé áhed bēnlīŋ bwāmbwam, bésēdté nhóg ne aníní bánken, “Cheé ékáá bonj anén mmwaád ábēbtē' enén ndín e dyǎg?

⁵ Béhélé'áá-sε bésóm ádén dyǎg nkun níme níchábé ámìn, bétéd níme mōné bébē betóótōkē bé bad.” Né-ǎó, bénhōbēn ane mmwaád bwāmbwam.

⁶ Bonj Yesue anláá bó aá, “Nyéchene mó. Cheé nyétagtéé mó? Abēnlé me kase e dyam echē eboó bwāmbwam.

⁷ Betóótōkē bé bad bébē ne nyé pónké ésyāāl, pónké ké ehéé echē nyédáá-'ε bó awōŋgen nyēhele nyēwōŋgén bó, me pen méebáá ne nyé pónké ésyāāl.

⁸ Abelé wéε mekáá mēpédé mó. Asyogé me dyǎg á nló ábonjen nlíme nímem á'sō é' pónké.

⁹ Ne mbále, nlāŋge nyé nén mēé, kéhéé áde nkalaŋ ní bwām mékanlédté nkōŋsé áte nísyāāl,

béhōb dyam áde anén mmwaád ábélé ákamten mó.”

*Judasε akwεnténé Yesuε asóm
(Mat 26.14-16; Luk 22.3-6)*

¹⁰ Ambíd e nê, mbapεε nhóg átíntê e bembapεε dyôm ne béβε awě béchágé’áá bán Judas Iskariōde ankě beprisε bémbáá atán ábel bon̄ ásóm Yesuε áwāb.

¹¹ Beprisε bémbáá bémbē menyinje ne dyam áde Judasε ánlāā’é bó, béhób-pe bán bébě mó mōné. Né-ṵ, Judasε ambootéd nzii ahed ásóm Yesuε.

*Yesuε ne ábē bembapεε bédyédé
Ndyééd e Nnyíme-ámīn
(Mat 26.17-25; Luk 22.7-14, 21-23; Jōn 13.21-30)*

¹² Bṵṵb-pṵṵ pónde e ngande e Ewele-é-Ngên empě. Mbwe mé’sō áde béwúē’áá bán bé rídyōṅ mí mbód ábon̄sen ndyééd e Nnyíme-ámīn, bembapεε ábe Yesuε béntān Yesuε, básedté mó bánken, “Héé wédəṅgé wεé sébon̄sen wε ndyééd e Nnyíme-ámīn?”

¹³ Dṵṵ Yesuε álóméé bembapεε béβε ne nlyógtén nén aá, “Nyékag á dyad-tê, mod ábomén nyé awě apémé apom dé mendīb, nyéhíde mó.

¹⁴ Nzé nyêpedé, nyéláa nwóó-ndáb bán, ‘Meléede ahóbé aaken, Héé ton̄ e beken édíf echě módyēē ndyééd e Nnyíme-ámīn áte ne ábē bembapεε?”

¹⁵ Alūméd nyé ton̄ echě ekalé áte echě bémáá abon̄sen, bénábpé-’ε áte. Ene ton̄ edé ámīn á ndáb-te. Nyébon̄sen syáā ndyééd áhed.”

16 Hée ábê bembapɛɛ béhídté bonj békäg á dyad-tê. Béntān mekan mésyā́l ngáne Yesue ánlā́'é bó, bēmbonjén-ne ndyééd e ngande e Nnyíme-ámin.

17 Née ngukél épédé Yesue ne ábē bembapɛɛ dyóm ne bébe bēmpě áhed.

18 Bedyágé'áá ndyééd á tébele. Póndé echě bedyákē ndyééd nê, dɔɔ Yesue áhóbéé áá, “Nlānge nyé nén meé, nyé mod nhóg äbě me á mekáá mé bad bé ekoyí, nyé nhóg awě adyág ndyééd ne me.”

19 Nén dēmběl bembapɛɛ bēnsudén bwāmbwam. Bēmbootéd mó asɛded nhóg ámbíd e aníní bán, “Ndúbpé meé saké me.”

20 Dɔɔ átímtanné bó áá, “Mod nhóg átíntē nyé bad dyóm-ne-bébe, mod awě sūmō sēētɔdé ewele á dīse-tē atɔde ahóg.

21 Mwān-a-Moonyonj äwē ngáne éténlédé bonj medim ne ane mod awě äsōm mó. Ebágáá bwām ne ane mod nzé bēnkētɔgen mó achyáa.”

Ndyééd echě Sāngwée

(Mat 26.26-30; Luk 22.14-20; 1 Kor 11.23-25)

22 Ade Yesue ne ábē bembapɛɛ bedyákē ndyééd nê, dɔɔ átédé ewele, ásāgnān Dyōb, bonj ákabtáád áte, ábagé ábē bembapɛɛ áhōbē áá, “Nyékob nén, yäl echēm nén.”

23 Ámbíd e nê, antéd mbwendé mí mīm, ásāgnān Dyōb, ábagé bó. Bó moosyā́l-le bémwāg.

24 Dɔɔ Yesue álāngéé bó áá, “Mmēm mekií mômén míme rísyógké á nló mí bad híin. Mmém mekií médií mekií mé melě mékōlē.

25 Ne mbále, nlānge nyé nén meé, méemwáá mímén mīm ámpē kááj ne epun éche mémwēē mó ekóólé á nkamlēn rí Dyōb.”

26 Bénkōn nkāngé mé nságnen. Née bémáá akón, bēnkě á Ekone é Menzab.

*Yesue ahóbe ngáne
Petro dbāngē mó á yǎl*

(Mat 26.31-35; Luk 22.31-34; Jōn 13.36-38)

27 Yesue anláá ábē bembapεε aá, “Nyé baásyāēl nyéēnyágéd, nyétēdē με. Ayāle éténlédé á kálag e Dyōb nén bán,

‘Měwūū nnōn-a-mbód,
mbód ésyāēl épántéd áte.’ ”

28 Dóo Yesue áhóbeé aá, “Boη áde ápuúdté με, měkě á’sō á Galilia áwed-taá nyétānnē με.”

29 Dóo Petro áhóbeé aá, “Ké moosyāēl annyágéd átēdē με, με pen méetēdēé με.”

30 Dóo Yesue álāngεé Petro aá, “Ne mbále, nlānge με μεé, nkūu nén dēn, nchóm-a-kúb adēhób aá mótō’ ngen ébe wěbāη με á yǎl ngen éláán.”

31 Héε Petro ábádtēé mó áte aá, “Ké nkāη móo bésēlēε με, méebāngé με áyāēl mbéd.” Bembapεε ábíníí bésyāēl bómpē bēnhōb melemlēm.

*Yesue akánné á Getsemani
(Mat 26.36-46; Luk 22.39-46)*

32 Ambíd e nē Yesue ne ábē bembapεε bēnkě á abwóg á hōm áde béchágé’áá bán Getsemani. Ade bépédé Yesue anláá bó aá, “Nyédyεε hén, με-’ε níke níkáne.”

33 Ankéén Petro, Jemse ne Jōne ákáne. Ndānge ne metake híin bēmpíi mó á nlém-tē.

34 Dóo álāngεé bó aá, “Ndānge echě edé με á nlém, ehεle-se ewúú με. Nyélyæg hén, nyédyεεn με epin.”

35 Ansídé á'sō, abwém yǎl ásē, bonj ákânne' aá nzé nzii edé echě ene pón dé e metake éhélé se ébāmē mó, ébame.

36 Anhób aá, "A-Tê, Titée, ehéle ébel kéchéé. Kobén me nímén metuné. Bonj ké nê, bǎl ngáne ébónnéde wε, saké ngáne ébónnéde me."

37 Ade áamáá akáne, antím ámbid wée ábê be-mbapεε bélaán. Antán née békúneé. Dóo álângeé Petro aá, "A-Simōn, ekúne'-ε? Cheé ékáá bonj weéhele awεsen ádyεen me epin ké háwa póg?"

38 Nyédyεε epin, nyékânne'-ε ábel nén Dyōb déemwäg-se mekágsen mépiinéde nyé. Nlém nídáá abel bonj ekob é yǎl édé mbwóg."

39 Antím ámbid ámpē, áke akáne melemlem ngáne ánsēbēē akáne.

40 Ade átímé ámbid ámpē, antán née békúneé áyāle e'chó bém bē bó á díd bwāmbwam. Né-óó bénkēmbí' é chōm éche belângeé mó.

41 Ade átímé ámbid ngen éche élónténé élaán dóo álângeé bó aá, "Nyélyǎgé nyékúne' nyékómme'-ε nyé áte-yε? Nê ákwógé! Pón dé epedé echě bēbēé Mwān-a-Moonyonj á mekáá mé bad bé mbéb.

42 Nyépáde ásē dékag. Nyénōne', mod awě akií me ntúré mó ahúε' nén."

Békóbé Yesue

(Mat 26.47-56; Luk 22.47-53; Jōn 18.3-12)

43 Ehób éepedéé Yesue amaa á nsal bonj Judase ápag. Judase abédéé mbapεε nhóg átínté e be-mbapεε dyōm-ne-bébe ábe Yesue. Ampě ne ndun e mod. Ábê bad bēnwālē nkwáté ne mbid. Bepriεe bém báá, bemeléde bé mbéndé ne bad bém báá bé Israel bóó bēnlōm bó.

44 Bɔɔb-pɔɔ, ntúré awe Yesue ammäd bó e'chemléd abe aá, “Kénzée awě méhēē tâl, né mod awě nyéhēdēē mōne. Nyékôb mó, nyéchəə-’e mó bwâm boŋ nyékēene mó.”

45 Judase apedé-’aá pēén, átōmē-’e wée Yesue. Anhób aá, “A-meléed.” Ahé-’e mó tâl.

46 Hée abê bad békóbé Yesue, bēwéd-te mó achəə.

47 Dóɔ mod nhóg átintē e bad ábe bém̄bē ne Yesue ádólé nkwaté á abám, née átómté mó, asél-le ntāŋ awě prise ambáám̄báa etúu.

48 Hée Yesue ásedtēé bó aá, “Nchíb móɔ nídií awě nyépēéné nkwaté ne mbid ahye dé akób-e?”

49 Epun tēé mbédé á Ndáb-e-Dyöb ne nyé, ní’yāgtē bad, nyéekóbe me. Boŋ e’yale é’ kálag e Dyöb é’tāŋgéné alón.”

50 Hē dóɔ bembapee bésyāāl bétédté mó, boŋ bétómé mehélé.

51 Kódemod póg ebédé áhed, éhídē Yesue ámbid. Anwáá dásō esón é abad chēmpen. Abê bad bēnkǎg bán békób mó,

52 boŋ antóm mehélé ne nsôb, áchennéd-te bó éché esón é abad.

Békáádté Yesue

(*Mat 26.57-68; Luk 22.54-55, 63-71; Jón 18.13-14, 19-24*)

53 Bad ábe bēnkōb Yesue bēnkēén mó wée Prise Ambáám̄báa. Beprise bém̄báá, bad bém̄báá bé Israel ne bemeléede bé mbéndé bēmpǎ bēlādēn áhed.

54 Ade békēeneé Yesue nē, Petro ahidé’áá mó ámbid mwă etūn káŋ asól á eyáde éche prise ambáám̄báa. Andyéé áhed ne benon bé Ndáb-e-Dyöb, áwālē muú.

55 Bəəb-pəə, beprise bémbáá ne bad bé káánsel bésyāəl béhéde'áá bad ábe bébīd mbónj é metóm á nló wée Yesue ábel nén béwúu mó, boŋ bénkēnkudté ké nhóg.

56 Ekud é bad émbīd mó mbónj é metóm á yəl, boŋ béēbédéé nsəl nhóg.

57 Héé donge á bad bétyéémé ámīn, boŋ bébīdē mó mbónj é metóm bán,

58 “Sēnwóg née áhóbé aá, ‘Měbootéd enén Ndáb-e-Dyōb echē baányonj bēlóó, nlónj empée, átíntē e e'pun é'láán echē béēlōnj_{nee} mekáá.’ ” 59 Boŋ ké nē, échab mbónj é metóm énkēmbáá nsəl nhóg.

60 Dóo prise ambáámbáa átyéémé ámīn átíntē e bad bé káánsel, boŋ ásedté Yesue aáken, “Weewóó'é dyamdyam ahób tñgene dyam ádé ábén bad béhóbé wε á yəl-ε?”

61 Boŋ Yesue andyéé mó ngēn, enkēnkobéé dyamdyam. Dóo ene prise ambáámbáa ésedtéé mó ámpē aá, “Wε-εé edé Ane-awē-Béwógte, Mwān awē Dyōb áde bad bébageé edúbé-yε?”

62 Héé Yesue ákwentanné aá, “Méé ndé, nyéēnyīn-ne ngáne Mwān-a-Moonyonj ádyéé á ekáá émbáá é Dyōb a Ngum. Nyéēnyīn-ne née áhúé'é á mbag-tē ámīn.”

63 Héé prise ambáámbáa ányábé mbóté álúmed nén aá mólíí, boŋ áhōbē aá, “Mbónj éhéé émpēe déhedéé?”

64 Nyéwógé née ásyā'é Dyōb. Cheé nyéhóbé á yəl eché?” Héé bó moosyāəl béhóbéé bán atñgéné awé.

65 Donge á bad bēmbbootéd mó meléed asob á yəl, békūtān mó mīd, bébōmé mó, bēlāngē-'ε mó bán, “Láá-'ε sé mod awē abōmé wε.” Dóo bembāledé bétédé mó, boŋ bébootéd-te mó abōmte.

*Petro abáá Yesue á yǎl**(Mat 26.69-75; Luk 22.56-62; Jɔn 18.15-18, 25-27)*

⁶⁶ Wée Petro ádyéé ásē nê á eyáde-tê, dɔɔ mbəlede nhóg a mmwaád awě prise ambáámbáa ápédé.

⁶⁷ Annyín Petro awále muú. Dɔɔ ásímné mó boŋ álāngē mó aá, “Wémpē wembé ne Yesue awě abídé á Nazarɛt.”

⁶⁸ Boŋ Petro ambáŋ échê ehób á yǎl, aá, “Meebíi’é, meesóŋtán-naá chòm éche éhóbɛé.” Amaá-aá ahób nê abíd-te á mmwe. Ene pónde chèn nchóm-a-kúb antón. *

⁶⁹ Dɔɔ ane mbəlede ányíne mó ámpē boŋ ábootéd bad ábe bébedé benben aláa aá, “Anén mod adé nhóg awě mómpē ahídé’áá Yesue.”

⁷⁰ Boŋ Petro ambáŋ á yǎl ámpē. Eebeméé áte ámpē dɔɔ bad ábe béntyēem áhed bélāngɛé Petro bán, “Mbále chó edé. Edé nhóg awě ahídé’áá Yesue, áyāle ebídé á Galilia.”

⁷¹ Boŋ Petro ambootéd yǎl ebómán abɛ ámwāg-ke melě aá, “Meebíi’é anén mod awě nyétúbɛé dīn nê.”

⁷² Melemlem mé pónde nchóm-a-kúb antón ngen échê élónténé ébe. Héɛ Petro ákámtné chòm éche Yesue ánlā’é mó aá, “Nchóm-a-kúb adêhób aá mótɔ’ ngen ébe wěbāŋ me á yǎl ngen éláán.” Héɛ Petro ábānlé awé, ábooted-te achii.

15*Paylede akáádté Yesue**(Mat 27.1-2, 11-14; Luk 23.1-5; Jɔn 18.28-38)*

* **14:68** Donje á kálag dé’só déewóó’é Ene pónde chèn nchóm-a-kúb antón.

¹ B̄in é'sánǵé-'áá sánǵén, beprise bémbáá, bad bémbáá bé Israel, bemeléede bé mbéndé ne bad bé káánsel embáá e bad bé Israel békób mbom. Bēnhǵn Yesue, bēbāg-ke mó á mekáá wée Paylede.

² Hée Paylede ásedtéé mó aáken, “Wε-εé edé kǵn e bad bé Israel-ε?” Yesue ankwentén mó áá, “Ngáne éhóbé.”

³ Beprise bémbáá bémbān mó ekud é mekan á yǎl.

⁴ Hée Paylede ásedtéé mó ámpē áá, “Weewóó'é dyamdyam áhób-ε? Mmǵn wógé' ekud é mekan échē bēhóbéé wε á yǎl.”

⁵ Boǵ Yesue enkēnhóbpe dyamdyam. Nē dēnkōmēd Paylede yǎl áte.

Bán Yesue atǵǵéné awé

(Mat 27.15-26; Luk 23.13-25; Jǵn 18.39-19.16)

⁶ Bǵǵb-pǵó, émbē nēn bán á Ngande e Nnyíme-ám̄n, Paylede ammentén mod a mbwǵg nhóg abíded á mbwǵg. Ane mod abágé'áá mod ké ahée awē bad bēnhεdēnné mó.

⁷ Ene pǵndé mod nhóg ambé á mbwǵg awē béchágé'áá bán Barabase. Abédé ne bad ábe béntyēēmēn nkamlēn í Roma.

⁸ Dǵó ndun e mod épédé wée Paylede, boǵ bēlǵngē mó bán ábel ngáne áménténé bó abele.

⁹ Hée ásedtéé bó aáken, “Nyēhede' bán, mbídted nyé kǵn e bad bé Israel-ε?”

¹⁰ Abíi áde ámb̄í'é áá kǵnjí edé beprise bémbáá áte á yǎl wée Yesue, dǵó dēnkǵn boǵ ásedēd bó nē.

¹¹ Boǵ beprise bémbáá békóné'áá ábē bad bán bēláa Paylede bán abídted bó dásō Barabase.

12 Paylede anseǵed bó ámpē aá, “Chán-nō nyéhedeé bán mbel ne mod awě nyéchəgeé bán kəŋ e bad bé Israel?”

13 Dóo bélébpéé e’saad bán, “Bomé mó á awəg.”

14 Héé Paylede áseǵteé bó aáken, “Ayāle chán? Ebébtéd éhéé ábélé?” Bon bēnnabé abón bán, “Bomé mó á awəg.”

15 Né-ǵó, ngáne Paylede áhéǵé’áá aá mókóǵed ábē bad mewēmtēn, ambíǵtéd bó Barabase. Ambě kunze aá, sǵnze ébom Yesue, bon bέke bέbome-ε mó á awəg.

*Sǵnze éwélé Yesue
(Mat 27.27-31; Jǵn 19.2-3)*

16 Sǵnze éntēd Yesue, békēēn mó á eyáde é nkamlēn, béléad-tē baáb ábíníí áte áhed.

17 Bénwāād mó mengombe níme méyəge’ níme méwǵgné mengombe mé kəŋ, béléŋ-’ε ekóte é mechǵ, béhé mó á nló. 18 Dóo bέbóótédé mó awel, bélénté mó bán, “A-kəŋ e bad bé Israel, edúbé ébē ne wε!”

19 Bέbómé’áá mó ntǵn á nló, bésobtád mó meléed á yǵl, bέbwǵgkē-’ε mó mebóbǵŋ áwel mó.

20 Ade bémáá mó awel, bénhūd mó nímē mengombe á yǵl, bétimēd mó éche mbóté chēn á yǵl. Néε bémádé nē, bēnkēén mó áke dēbome mó á awəg.

*Bέbómmé Yesue á awəg
(Mat 27.32-44; Luk 23.26-43; Jǵn 19.17-27)*

21 Ade békagké nē, dóo bέbómné mod awě ambíd á dyad á Sirine. Dín démbē mó bán Simone. Simone abéǵε sáá awě Alesandaa bó Refuse. Simone atómé’áá ásól á dyad-tē. Dóo békóbé mó bon bényǵgtē mó bán ápēm awəg áde Yesue.

22 Dóo bépédé hõm áde béchágé'áá bán, Golgota, awě adé nén bán, “Hõm dé Ebõngél é Nlõ.”

23 Ahed bẽmbě Yesue mĩm nĩme beládténé ne bwel ábe béchágéé bán mía* bán ámwê, bon enkẽnkwenténné amwé.

24 Bẽmbomé Yesue á awõg. Bẽnsĩd mbambú ákab éche mbóté.

25 Mbwembwẽ á ngáŋ abog dóo bébõmmé mó á awõg.

26 Chõm éche bẽntenlé á awõg áwe nló mĩn álúmed nzõm echě bébõmnédé mó á awõg émbē nén bán, “Kêŋ e bad bé Israel.”

27 Bẽmbomé-’ε bechĩb bébε bómpē á awõg, nhóg á pẽd e ekáá émbáá eche Yesue, aníní-’ε á pẽd e ekáá é emwẽd.†

29 Bad ábe bétómé’áá nzii benben ne áhed bébómé’áá nló, bébwẽmmē-’ε mó nzyáŋ bán, “Ahá! Wenhób wεé mósõbõõtēd Ndáb-e-Dyõb, wεé mólõŋ-’ε chõ ámpē áfĩntē e e’pun é’láán.

30 Sõŋ-õ echõŋ yǎl bõõb, ésud ásē á awõg.”

31 Melemlem nê dóo beprisẽ bẽmbáá ne beléede bé mbéndé béwélé’áá mó. Bẽn ne bẽn béhóbé’áá bán, “Achõŋté’áá bad, bõõb eéhẽléé eche yǎl awõŋgen.

32 Mó awě ahóbé áá móõ módē Ane-awě-Béwõgté, áá móõ módē-’ε kêŋ e bad bé Israel ásud-tõó ásē á awõg hẽ bõõb, dényĩn ábel dédúbe.” Abẽ bechĩb ábe bẽmboméé á awõg nchoo ne Yesue bómpē bésyáá’áá mó.

* 15:23 *Mia*: mébédéẽ bwel ábẽ bad bébẽnládtáá ásuded mewẽ.

† 15:27 Donje á kálag dé’só ábádé nchoo 28: *Adẽ nén ábẽnlédé, e’yale ábẽ é’ténlédé á kálag é Dyõb bẽnlõn. Eténlédé nén bán, ‘Bẽntõŋ mósmpē á nchoo mé bebel bé mbéb.’*

*Kwééd eche Yesue**(Mat 27.45-56; Luk 23.44-49; Jɔn 19.28-30)*

33 Ade kəd épédé, ehíntén ênkwě hǒm ásyāāl, káǎn ne á ngǎn éláán.

34 Ade ngǎn éláán épédé, Yesue anlébé esaád aá, “Elí, Elí, lámá sábatāni.” Nén adé nén bán, “A-Dyǒb ádêm, a-Dyǒb ádêm, cheé ékǎá bonj étɛdté me?”

35 Néε donje á bad ábe bémbē benben béwógé nê, bénhǒb bán, “Nyéwóge’, achênle Elaijaa aá áhyε áwǒngɛn mǒ.”

36 Héε mod nhóg ányǎgté bonj átédé kuchá, átɔdté’ á ebéntéd é mǐm-té, ásómé’ á ntǒn bonj áhǎg mǒ á nsəl aá ámwê. Anhób aá, “Nyémwε dényǐn nzé Elaijaa áhyε mǒ asuded á awǒg.”

37 Héε Yesue álébpé esaád bonj ámīē-’ε nlém.

38 Ene pǒndé chèn abad áde dênkǎb Ndáb é Dyǒb áte, dênسالé áte e’pɛd é’bε bootya ámǐn káǎn ápē-’ε ásē.

39 Adé mod ambáá a sǎnze awě antyéém Yesue á’sǒ-te ánǎn mǒ ányǐné ngáne Yesue áwédé,‡ anhób aá, “Ne mbále, anén mod abédéε Mwǎn a Dyǒb.”

40 Bebaád behóg bǎmpē bémbē nchabnede bénǎne’ mekan mésyāāl nǐme mébenlad. Atínté e ábē bebaád, Maria Magdalεε, Salomε ne Maria awě achyáá Jemse asad bó Joseb, bémbē áhed.

41 Abén bebaád behídé’áá Yesue áde ámbēē á Galilia, béwǒngǎn-nε mǒ. Ekud é bebaád émpēe éche bǒbǒw bēmpě á Jerusalem chǎmpē êmpě áhed.

*Nǐme nǐme Yesue**(Mat 27.57-61; Luk 23.50-56; Jɔn 19.38-42)*

‡ 15:39 Awédé: Donje á kǎlag dé’sǒ áwóó alébpé esaad, awé-’ε.

42-43 Mod nhóg abédé awě béchágé'áá bán Josebe. Ambíd á dyad á Arimatia. Anén mod abédeé mod e edúbé a káánsel embáá e bad bé Israel. Mómpē asiné'áá póndé echě nkamlen ní Dyöb mépéé. Ngáne émbēē mbwε mé mboṅsén (nédē áde mbwε-mé-nkóme-áte nílyógé née chǎn), hée ákáá nlém, boṅ ápag wée Payledε benben ne ngukél, álāngē mó aá ábe mó ndim míme Yesue.

44 Ade Payledε áwógé bán Yesue amaá awé, yǎl enkóm mó áte. Hée álómé ane mod a mbáá a sánze achəg boṅ ásedtē mó ké Yesue amaá awé.

45 Ade ene sánze élanṅē mó aá Yesue awédé, dǒo ákwénténé aá Josebe átēd míme ndím.

46 Josebe anchǎn mbóm. Antéd Yesue ndim, ákáān mó ene mbóm, alímé-'ε mó á soṅ-tē echě bépwógé aláá áte. Ambíd ene, antínéd aláá á mbáá ákólen nsəl ní soṅ.

47 Maria Magdalεε ne Maria awě anchyáá Joseε bénóné'áá wée bélimméé Yesue.

16

Yesue apuídé

(Mat 28.1-8; Luk 24.1-12; Jǒn 20.1-10)

1 Ambíd e mbwε-mé-nkóme-áte Maria Magdalεε, Maria awě achyáá Jεmε ne Salomε, bēnchǎn dyǒg dé elod é bwām áke dé awóged ndim míme Yesue.

2 Mbwεmbwε mé epun é'sō é Sǎndé áde enyεn étúbéé dǒo békíí á soṅ.

3 Ade békagké, dǒo bésedteé nhóg ne aníníí bánken, "Nzée áhūdē syánē aláá á nsəl ní soṅ?"

4 Dǒo bésádé dǐd, boṅ bényīnē bán bémáá áde aláá ahúd. Aláá áded dēnkəl bwāmbwam.

⁵ Héε bésólé á soη-tê, boη bényīnē kódemod edyεé á nkag á pεd e ekáá émbáá. Anhé megombe míme mépúbe'. Nén dénkōbēd bó mbwóg bwāmbwam.

⁶ Héε ene kódemod élāngeé bó aá, “Nyéebáá’, mbíí mεé nyēhede’ Yesuε, mod a Nazaret awē bēmboméé á awog. Apuúdé, eésaa hén. Nyénone wéε bēnnaádté mó.

⁷ Nyékag-kó bōob nyéláa ábē bembapεε, tanje Petro, bán Yesuε apuúdé, ‘Akag-ke á’sō á Galilia. Awed-taá nyényīnnē mó ngáne ánlāá’ é nyé.’ ”

⁸ Héε bēbóótédé anəη ne menyáké míme bényīné. Bēmbīd á soη-tê bébootéd-tε anyaged. Béélānge-’áa modmod dyamdyam áyāle mbwóg ménkōb bó.

Nyaa póg echē Kálag e Makose ésógé*

16.9-20

*Yesuε alúmté Maria Magdalene yāl
(Mat 28.9-10; Jōn 20.11-18)*

⁹ Ade Yesuε áamáá apuu, epog é mbwεmbwε é epun é’sō é Sōndé, Maria Magdalene mōó ánsēbēē yāl alúmed. Anén mmwaád mōó Yesuε ámbīdēdtē e’dáádəη bé mbéb saámbe áte.

¹⁰ Héε ane mmwaád ákíí boη álāngē bad ábe bōobε Yesuε bēbágé’áá. Antán née béchyε’ é kwééd eche Yesuε.

¹¹ Boη áde bēwógé bán Yesuε adé á alonjé, bán ane mmwaád anyīné-’ε mó, bēnkēndúbéé.

* 16:8 Donje á kálag dé’só déewóó’ é nchoo 9-20.

Yesuε alúmté ábē bad bébε yǎl
(Luk 24.13-35)

¹² Ambíd e pón dé Yesuε anlúméd yǎl wéε ábē bad bémpēe bébε áde bēbídεé á dyad-tê. Boŋ enén ngen anlúméd yǎl nyaa émpēe.

¹³ Héε ábē bad bétímé ámbíd, békε béláá baáb ábíní. Boŋ ké nê, baáb bē bénkëndúbéé.

Yesuε alúmté ábē bembapεε
dyôm ne nhóg yǎl
(Mat 28.16-20; Luk 24.36-49; Jɔn 20.19-23; Mbél 1.6-8)

¹⁴ Ambíd e pón dé Yesuε anlúméd yǎl wéε ábē bembapεε dyôm-ne-nhóg áde bédyágkē ndyééd. Bénkëndúbéé bad ábe bēnhōb bán bényíné mó áde áamá apuu. Né-ɔ́, ankáné bó áte aá béewóó'ε adúbe, aá bélélé-'ε nlém á abum.

¹⁵ Anláá bó aá, “Nyékag nkōŋsé áte nisyāāl, nyékanle bad bésyāāl nkalaŋ ní bwâm.

¹⁶ Kénzée awě adúbpé boŋ bédusén-ne mó ákūd e'choóchoŋ, boŋ kénzée awě eedúbpé ákūd nkógsen.

¹⁷ Bad ábe bédúbpé bēwōŋ ngíne ábel mam mé menyáké: bēbídte bad e'dəádəŋ bé mbéb áte á dín ádém; bēhōbē-'ε mehób mékōlē.

¹⁸ Békōbēn nyō mekáá, éebεnlé bó dyamdyam. Ké bémwε-'ε ké e'wε, ábē e'wε béebεnlé bó dyamdyam. Bébān bad bé nkole mekáá á yǎl, bad bé nkole bē bédyēε-'ε bwâm.”

Yesuε apūmmé
(Luk 24.50-53; Mbél 1.9-11)

¹⁹ Ade Sánǵú Yesue á máá bó nímén mekan aláa, dɔɔ Dyɔb ábélé bon ǵpūmē ámín. Andyéé Dyɔb á ekáá émbáá.

²⁰ Héé bembapεε bébídé, bon béke békalé Eyale é Dyɔb hǒm tée. Sánǵwée ambé ne bó, ábē-’ε bó ngíne ábel mekan mé menyáké, álúmed nén áá chǒm éche béhóbεé édé mbále.

Nyaa empée eché kálag e Makɔse ésógé†

16.9-10

[(9) Héε ábē bebaád békíí, bon bélāngē Petro ne bad ábe bémbē ne mó mekan mésyāāl níme bénylāgtēnnē bó, bésēlē mó esón-esón. (10) Néε nē átómé, Yesue mwēn anlóm bad nkǒnsé áte rísyāāl ákal nkalaŋ ní bwām. Mmē nkalaŋ ní bwām níme rísáá, méehəŋlǎnné. Mmē nkalaŋ rídíi nkalaŋ tǎhgene alonǵé áde débē á ngíndé ne á ngíndé.]

† **16:20** Donge á kálag dé’só ábádé ádén asóg á kálag ámbíd e nchoo 8.

Mel̃ Mékōōlē
New Testament in Akoose (CM:bss:Akoose)

copyright © 2011 Wycliffe Bible Translators, Inc.

Language: Akoose

Translation by: Wycliffe Bible Translators, Inc.

Akoose

bss

Cameroon

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Akoose

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 18 Apr 2025 from source files dated 29 Jan 2022

0143729f-907e-5098-b6ce-63b1629b8e48